

TUTÚ NÍ CADÚHA TÉ PǼBLÚ QUIHIⁿ NDAHA ÑÁYIU ÑUÚ RÒMÁ

*Té PǼblú cáduha-dé tutú quihiⁿ ndaha ñáyi
xñndecu ichi Xítóhó Jesucristú ndécú ñúú Rómá*

¹ Yúhú té PǼblú xínú cuèchi-í núú Xítóhó Jesucristú, chi mee Yǎ Ndiǒxí ní cachí-gá sá cúu-í ñⁿ téé cáháⁿ tnúhu-gá núú ñáyi, te tnúhu-gá cúu-xí tnúhu sá càháⁿ nàcuáa naníhí tǎhú-ó, núú ñu-gá ní tendaha ñàha-gá xii-í xícá cùu-í càháⁿ-í tnúhu-gá.

² Te ndéé şanaha ñí cachí Yǎ Ndiǒxí sá dàcuítí sàá nduu ngñndecu ndihí ñáyi tnúhu-gá. Te ducaⁿ ñí xáhaⁿ-gǎ xii cue téé ní cáháⁿ tnúhu-gá dàvá-áⁿ ñí chídó tnùní-güedé núú tütú-gá. ³ Te tnúhu-gá sá càháⁿ-í-a càháⁿ-xi ñu-ni cuèndá Xítóhó Jesucristú Yaá cúú Dèhe-gá. Te Dèhe-gá-áⁿ cúú-gǎ ñⁿ ñáyi, te cùu-gá ñani tnáhá ndí Dàví. ⁴ Te cùu-gá Yaá ñá túú tnàhí cuéchi-xi. Te ní xíhí-gá te ní ndoto-gá, te xǎⁿ cútnùní iní-ó sǎ cúú-gǎ Dèhe Yá Ndiǒxí, te ío càhnu cuu-gá. ⁵ Te ñu-ni Xítóhó Jesucristú ní quide-gá ní nduu tǎhù-í núú Yǎ Ndiǒxí sá càháⁿ-í tnúhu-gá núú cuè ñáyi ñuyíú-a cuèndá quíndáá iní-yu tnúhu-gá te canchicúⁿ nihnú-yu cadá-yu nchaa nàcuáa càháⁿ-xi, te ducaⁿ ño cuu càhnu-gá. ⁶ Te tnàhá nchòhó cúú-ndó ñáyi sa nchìcúⁿ nihnu quide-ndo nchaa nacuáa càháⁿ tnúhu-áⁿ, chi ní cachí Yǎ Ndiǒxí sá nchòhó tnahá tnúhu-ndo ndíhí Xítóhó Jesucristú. ⁷ Te nchòhó

ñáyiú xĩndecu ñuú Ròmá, ñáyiú ío cùu iní ñáhá Yă Ndiõxí, càdúha-í tutú-a daquixi-í ndaha-ndo. Te ðiu-ni nchòhó cúú-ndó cuè ñáyiú ní cachí Yă Ndiõxí cada ndáá cundecu-ndo nũú-gă. Te xicáⁿ táhù-í núú Tătá-ó Dütú Ndiõxí ndihí núú Xítohó Jesucristú sá ïo na chĩndee chítúu ñaha-gă xii-ndo, te ducaⁿ ndì nduú-gá ná càda te ío váha cuu iní-ndó cùndecu-ndo.

Té Păblú cuiní-dé quíhíⁿ ngoto-dé cue ñáyiú xĩndecu ichi Xítohó Jesucristú ndécú ñuú Ròmá

⁸ Te díhna nuu-gă càchí tnúhu-í xii-ndo sã ïo ndácáⁿ táhù-í núú Yă Ndiõxí cuendá sá ïo sàndáá iní-ndó-gă, te nchaa ñáyiú nihí-yu tnúhu sá dúcáⁿ quide-ndo. Te Xítohó Jesucristú dáyãha-gă nchaa tnúhu càháⁿ-í núú Yă Ndiõxí. ⁹ Te ndi tnahá òré càháⁿ ndihí-í Yă Ndiõxí ducaⁿ-ni xicáⁿ táhù-í núú-gă cuendá-ndó, te mee-gă náhá-gă sá càháⁿ ndáá-í, te ðiu-ni núú-gă xínú cuèchi-í ni yùhu ni iní-í, chi càháⁿ-í nàcuáa ní quide Déhe-gă Xítohó Jesucristú cuendá naníhí tàhù-ó. ¹⁰ Te xicáⁿ táhù-í núú Yă Ndiõxí sá nũu mee-gă ná càchí te sáá ìⁿ nduu quixi coto ñaha-í xii-ndo. ¹¹ Chi ío cuiní-í cundecu ndihí ñaha-í xii-ndo dànehé ñáhà-í ìⁿ ũú tnúhu nàcuáa ío-gă chĩndee ñàha Espíritú Yă Ndiõxí xii-ndo, te ducaⁿ ïo-gă cuita nducu ndèe-ndo cada-ndo nchaa nacuáa cuiní-gă. ¹² Te ío chí ná cuãha tnàha-o tnúhu ndee iní cundecu-o ìchi-gă, chi nchòhó ndihí yúhú ío sàndáá iní-ó-gă.

¹³ Te nchòhó ñáyiú ndècu ndihí-í ichi Xítohó Jesucristú na càchí tnúhu-í xii-ndo sã dúcáⁿ-ní ïo sàni iní-í quixi coto ñaha-í xii-ndo. Te cuiní-í sá òré quixi coto ñaha-í xii-ndo, te vá cuíta chùuⁿ quixi-í dàtná quidè-í òré sãngoto-í nchaa ñáyiú dava-gă

ñúú ñá túú xíta chiùⁿ-í chi ío váha sàhúuⁿ-yu tnúhu càháⁿ-í, dico ñá ndácù-í quixi-í quixi coto ñaha-í xii-ndo. ¹⁴ Te yúhú yídiquì-í cáháⁿ-í tnúhu Xítohó Jesucrìstú núú nchàa ñáyiú càháⁿ tnúhu grìégú, ndihì núú nchàa ñáyiú càháⁿ dava-gá núú tnúhu, ndihì núú nchàa ñáyiú túha, ndihì núú nchàa ñáyiú ñá túú tǔha. ¹⁵ Te cuèndá sá dúhá yídiquì-í cáháⁿ-í tnúhu-gá, xǎⁿ ío cuìní-í danèhé ñáhà-í xii nchaa nchòhó ñáyiú ñúú Rómá nàcuáa ndùu tnúhu sá càháⁿ nàcuáa naníhí tǎhú-ó.

Ío cùnuu tnúhu Xítohó Jesucrìstú

¹⁶ Te yúhú ñá túú tnàhí cùcahaⁿ núù-í cáháⁿ-í tnúhu Xítohó Jesucrìstú, chi cùu-xi tnúhu ío cùnuu, chi Yá Ndiǒxí ní cachí-gá sá ncháá ñáyiú na quìndáá iní-xi tnúhu-áⁿ te naníhí tǎhú-yu. Te ní cachí-gá sá dǎhnanuu-gǎ ñáyiú isràél ngúndecu ndihí-yu tnúhu-áⁿ te dǎtnùnì ngúndecu ndihì ñáyiú ñá túú cùu ñáyiú isràél. ¹⁷ Te tnúhu-áⁿ dánèhé ñáhá-xí xì-o sá cúdiu-o núú Yá Ndiǒxí te núu mee-nì sǎ quìndáá iní-ó-gǎ dàtná càháⁿ-xì núú tütú-gá núú càchí-xi: “Nchaa ñáyiú sàndáá iní ñáhá xì Yá Ndiǒxí cúdiu-yu núú-gǎ, te ndècu ndihì ñáhá-yu xii-gá”, duha càchí-xi núú tütú-gá.

Nchaa ñáyiú ndècu ñuyú ndècuéchi-yu

¹⁸ Te ndéé andiú tèndaha Yá Ndiǒxí sá ùhú quixi sá cúu-xì nchàa ñáyiú ñá túú quide ndáá núú-gǎ, ñáyiú quide nchaa sá cuèhé sá dúhá. Te cuèndá nchaa sá quídě-yu-áⁿ xǎⁿ ñá túú cuìní-yu tní-yu tnúhu ndáá tnúhu Yá Ndiǒxí cuèndá cuu-xì ñⁿ sá vǎha sá cúu-xì-yu. ¹⁹ Te cuèi ducaⁿ quidé-yu dico cùtnunì ndáá iní-yu nàcuáa ndùu sá sání iní

Yă Ndiõxí ndihî nàcuáa ndùu sá quidé-gă dàtná cùtnùní iní nchaa dava-gá-yu, chi ñu-gă dánèhé ñáhá-gă xií-yu. ²⁰ Te ni vă ndácú-ó quini núú-ó năsa cãa-gá, te ni vă ndácú-ó quini-ó năsa cãa iní-gá, te ni vă ndácú-ó quini-ó năsa quide-gá táxi tnùní-gá nchaa nduu nchaa quíú. Te cuěi ducaⁿ dico ndéé cùtnàhá ní ngáva ñuyíú nĩ ngũita nchaa ñáyiu tècú tnùní váha-yu nàcuáa ndùu sá sání iní-gá ndihî nàcuáa ndùu sá quidé-gă te ducaⁿ tècú tnùní-yu cuendá nchaa sá nĩ cadúha-gá ndéhě-yu ío ñuyíú-a, núu xiăⁿ vá cãchí-yu sá ñà túú cuěchi-yu. ²¹ Te cuěi ducaⁿ nĩ cutnùní iní-yu cuendá Yă Ndiõxí dico ñà túú cuini-yu canehé-yu sá yĩñuhu núú-gă nàcuáa tàú-xi cunduu. Te ni ñà túú cuini-yu ndacáⁿ táhũ-yu núú-gă cuendá nchaa sá vãha quide ñaha-gá xií-yu, chi mee-ni nchaa sá ñà túú vèdana nàndihî ññuhu iní-yu. Te quidé-yu dàtná quidé ñⁿ ñáyiu ñà túú ndècu ndihî nchaa sá xini tnùní-xi. Te uuⁿ-gá uuⁿ-gá tá quidé-yu cuáháⁿ. ²² Te cãchí-yu sá cùú-yu ñáyiu ío váha sàá sá xini tnùní-xi dico ñà ndàá, chi cùú-yu ñáyiu ío nĩ ñquí-xi. ²³ Te ñà túú cuini-yu cáháⁿ-yu sá ío cãhnu cuu Yă Ndiõxí Yaá ndécú nchaa nduu nchaa quíú, chi da nchaa sá nĩ cadúha mèé-yu quide cahnú-yu. Te ní cadúha-yu nchaa sá nàhá ñáyiu ñà túú cùdí ndècu ñuyíú-a. Te ní cadúha-yu sá nàhá quiti ndava, ndihî sá nàhá quiti sàcuíta ññuhu mee-xi, ndihî sá nàhá nchaa dava-gá quiti, nchaa xiăⁿ quidé cahnú-yu.

²⁴ Te xiăⁿ nũu ní dáñá Yă Ndiõxí quidé-yu nchaa sá cuèhé sá dúhá sàni iní-yu. Te xiăⁿ ío quide ndihî tnahá-yu sá cuèhé sá dúhá sàcùú-xi yiqui cuñú-yu.

25 Te ducaⁿ quidé-yu chi ñá túú sàndáá iní-yu tnúhu ndáá tnúhu Yá Ndiǒxí. Te mee-ni tnúhu ndehnde sàndáá iní-yu, te nèhé-yu sá yíñùhu núú dàva sá ní cadúha-gá ío ñuyíú-a ndihí dava sá ndèé andiú te quide cahnú-yu, te ñá túú càchí-yu sá méé-gă ío cànhu cuu-gá, dico mee-gă xíní ñùhu-xi cáháⁿ-yu sá ío cànhu cuu-gá ni caa ni quíhíⁿ. Te ndáá ndisa sá ío cànhu cuu-gá.

26 Te sá dúcáⁿ ñà túú quide váha-yu núu xǎⁿ ní dáñá-ñă Yă Ndiǒxí quidě-yu nchaa sá cuèhé sá dúhá sàni iní méě-yu. Te dava ñáyiú dìhí cáháⁿ ndihí tnàhá-yu ndi mèè dihí-yu te ñá túú quidé-yu nàcuáa ní nduu táhǔ-yu cadá-yu. 27 Te diú-ni ducaⁿ xǐquide dava cue téé chi sàni cuehé sání dùha iní-güedé sá cúú-xí yìqui cuñú-güedé ndi mèè tnaha téé-güedé, chi cáháⁿ ndihí tnàha ndi mee-güedé te ñá túú quide-güedé nàcuáa ní nduu táhú-güedě cada-güedé, te sá dúcáⁿ quide-güedé te ñá túú tnàhí cùu váha iní-güedé ndécú-güedě, te ducaⁿ tnàhí tàú-xi ndoho-güedé cundecu-güedé.

28 Te ñá túú tnàhí ñùhu iní-yu Yá Ndiǒxí nǔu xǎⁿ duuⁿ duuⁿ ní dáñá ñìhnu ñaha-gá xií-yu sàni cuehé sání dùha iní-yu, te quidé-yu nchaa sá ñà túú tàú-yu cadá-yu. 29 Te nchaa núú sǎ cuèhé sá dúhá cùnūu quidé-yu. Te cue téé cáháⁿ ndihí-güedé ñáyiú dìhí te ñá díú ñàdihí-güedé cúú-yu. Te diú-ni ducaⁿ xǐquide cue ñáyiú dìhí chi cáháⁿ ndihí-yu cue téé te ñá díú yǐ-yu cùu-güedé. Te mee-ni sǎ ñà túú vǎha quidé-yu sá cúú-xí tnàha ñáyiú-yu, te xihó-yu cundecu ndihí-yu sá ndécú ndihí dava-gá tnàha ñáyiú-yu, te ío sàni cuehé sání dùha iní-yu

sá cúu-xí tnàha ñáyiú-yu, te ío cuédú ínì-yu, te sàhni tnahá-yu, te ío plètú-yu, te dándahú tnáhã-yu, te cùu úhú ínì-yu cue tnàha ñáyiú-yu, te ío yiti yùhú-yu. ³⁰ Te càháⁿ cuèhé-yu cuéndá nchaa dava-gá tnàha ñáyiú-yu, te cùu úhú ínì-yu Yá Ndiõxí, te xio xio cuìní-yu cunuu tnúhu-yu, te mee-ni sàni ínì-yu sá ïo váha cunduú-yu, te ío quìde cahnú-yu mèé-yu, te ío sàni ínì-yu sá cádá ùhú-yu tnàha ñáyiú-yu, te ñá túú sàndáá ínì-yu ni tãtã-yu ni nãñã-yu. ³¹ Te ñá túú tècú tnùnì-yu sá vãha, te ñá túú quìdé-yu ìⁿ sá càháⁿ-yu, te ñá túú cùu ínì-yu ni ñáyiú cùu ndi meé-yu, te ni dàva-gá tnàha ñáyiú-yu, te ñá túú quìde cahnu ínì-yu ìⁿ sá cúmãní nùú tnáhã-yu, te ni ñá túú cùndahú ínì-yu tnàha ñáyiú-yu. ³² Te Yá Ndiõxí ní cachí-gá sá ncháá ñáyiú ducaⁿ xíquide quíhíⁿ-yu núú ùhú núú ndàhú. Te xìnì-yu sá Yã Ndiõxí daquìhíⁿ ñáhã-gã xií-yu núú ùhú núú ndàhú sá dúcáⁿ quìdé-yu, dico uuⁿ-gá quídě-yu chi váha-gá cúu ínì-yu cue ñáyiú quìde datná quídé mèé-yu.

2

Yá Ndiõxí cada ndáá-gá cuéchi nchaa ñáyiú ndècu ñuyúú

¹ Te nchòhó ñáyiú càchí sá ïo ndècu cuéchi dava-gá ñáyiú tnáhã-ndó ïo ndècu cuéchi-ndo cuèi nágá ñáyiú cùu-ndo, chi tnáhã-ndó quìde-ni-ndo nchaa nacuaa quìde dava-gá ñáyiú càchí-ndó ndècu cuéchi-xi, te sá dúcáⁿ càháⁿ-ndó sã ndécú cuéchi ñáyiú-áⁿ te dàcaa-ndo cuéchi díquí-ndó chi tnáhã-ndó quìde-ndo datná quídě-yu. ² Te nchoo xìnì-ó sã Yã Ndiõxí ío váha cùtnuní ínì-gá

nàcuáa cada ndáá-gá cuéchi ìⁿ ìⁿ nchoo ñáyiú ndècu ñuyíú-a, chi daquìhíⁿ-gá nchaa ñáyiú quide nacuáa ní cáháⁿ-í núú ùhú núú ndàhú. ³ Te nchòhó ñáyiú ìⁿ-ní quide ndìhì ñáyiú càchí mée-ndó sá ndécú cuéchi-xi dacuítí sá ná chǎhu-ndo núú Yǎ Ndiǒxí sá dúcáⁿ quide-ndo. ⁴ Te ñá túú cùu váha iní-ndó sá Yǎ Ndiǒxí cùndàhú iní ñáhá-gǎ xii-ndo, te ni ñà túú cùu váha iní-ndó sá ìo cuìní-gá cada càhnu iní-gá nchaa sá ñà túú váha quide-ndo, te ni ñà túú quide cuendá-ndó sá Yǎ Ndiǒxí quidé váha ñaha-gǎ xii-ndo cuèndá cuìní-gá sá nchòhó ndixi túu iní-ndó sá ñà túú quide váha-ndo ndècu-ndo. ⁵ Te nchòhó cúú-ndó ñáyiú ío sàà iní-xi, chi ñá túú cuìní-ndó ndixi túu iní-ndó sá ñà túú quide váha-ndo ndècu-ndo, te xǎⁿ núu ío-gá tá cùu vai tnúndòho sá cúú-xí-ndó. Te na sàà nduu tnúhu ndòho tnúhu ndàhú te ío ndoho-ndo, chi Yá Ndiǒxí cada ndáá-gá nàcuáa ndùu cuéchi-ndo. ⁶ Te dàvá-áⁿ cada ndáá Yǎ Ndiǒxí nchaa nàcuáa ndùu nchaa sá ñí quide ìⁿ ìⁿ ñáyiú ndècu ñuyíú-a. ⁷ Te nchaa ñáyiú nchìcúⁿ nihnu-ni quide mee-ni sá váha, ñáyiú-áⁿ nduu táhù-yu cundecú-yu ndìhì Yá Ndiǒxí ñi caa ñi quíhíⁿ, te ducaⁿ quide váha-yu chi cuìní-yu sá Yǎ Ndiǒxí cuu váha iní ñáhá-gǎ xii-yu, te cuìní tucú-yu nduu táhù-yu núú ìo váha càa ndecu Yá Ndiǒxí cundecú-yu ñi caa ñi quíhíⁿ. ⁸ Te ío cùdéeⁿ-gǎ núú nchàa ñáyiú ñùhu iní mee-ni sá cúú-xí mée-xi, te ñá túú sàndáá iní-yu tnúhu ndáá chi mee-ni sá cuèhé sá dúhá quidé-yu. ⁹ Te nchaa ñáyiú ducaⁿ xǐquide ío ndìhú iní-yu. Te díhna-gá ñáyiú isràél ngüíta-xi ndohó-yu, te dǎtnùní ngüíta-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quide

váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ñi quide váha-yu, te ío váha cuu iní-yu cundecú-yu. Te díhna-gá ñáiyu isràél ñáiyu ní quide váha ducaⁿ càda ñaha-gá xii-yu, te dǎtnùní ducaⁿ càda ñaha-gá xii ñáiyu ñá túú cùu ñáiyu isràél ñáiyu ní quide váha.

11 Te ñá túú quide cuendá-gá cuèi náí ñáiyu cùú-yu. 12 Te nchaa ñáiyu ndècu ndihí nchaa tnúhu ní chídó tnùní ndíi Moisés, Yá Ndiöxí cada ndáá-gá cuéchi-yu nàcuáa càháⁿ nchaa tnúhu-áⁿ. Te nchaa ñáiyu ñá túú ndècu ndihí tnúhu ní chídó tnùní ndíi-áⁿ, Yá Ndiöxí vá cáda ndáá-gá cuéchi-yu nàcuáa càháⁿ nchaa tnúhu-áⁿ. Dico nchaa ñáiyu quide nándi sá cuèhé sá dúhá dàcutíí cuíta ni-hnú-yu cuèi ndècu ndihí-yu tnúhu ní chídó tnùní ndíi Moisés àdi ñá túú ndècu ndihí-yu. 13 Te nchaa ñáiyu dìcò-ni sàcúndedóho nchaa tnúhu ní cáháⁿ ndíi Moisés te ñá túú tní-yu, ñáiyu-áⁿ ñà túú cùdiú-yu núú Yá Ndiöxí, dico nchaa ñáiyu tní nchaa tnúhu ní cáháⁿ ndíi, ñáiyu-áⁿ càchí Yá Ndiöxí sá cùdiú-yu núú-gǎ, chi ñá túú-gǎ cuéchi-yu ndècu núú-gǎ. 14 Te nchaa ñáiyu ñá túú ndècu ndihí tnúhu ní chídó tnùní ndíi Moisés, te núu quidé-yu nchaa nàcuáa ní cáháⁿ ndíi te cùu-xi ñⁿ sá sání tnàhí iní méè-yu cadá-yu, te sá sání ìní-yu-áⁿ cùú-xi ñⁿ tnúhu váha sá sánú ìchi ñaha xii-yu nàcuáa cada váha-yu cundecú-yu. 15 Te sá dúcáⁿ quidé-yu xiǎⁿ cùtnùní sá sání ìní-yu dǎtná càháⁿ tnúhu ní chídó tnùní ndíi Moisés cada ñáiyu isràél, te ío váha cùtnuní iní-yu nchaa nàcuáa quidé-yu chi ndixi túu iní-yu òré ñá túú quide váha-yu. 16 Te sáá nduu te Yá Ndiöxí cúñaha-gǎ xii Xítóhó Jesucrístú

cada ndáá-gá nchaa cuéchi ñáyi, nchaa sá sání ìní mée-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nacuáa naníhí tǎhú-ó, tnúhu sá dǎnèhé ñàhà-í xii-ndo.

Cuèndá ñáyi isràél ndìhi cuèndá nchaa tnúhu ní chídó tnùnì ndí Moisés

¹⁷ Te nchòhó ñáyi isràél nchaa-ndo cùu-ndo ndì mee-í, te càchí-ndó sǎ nchìcúⁿ nihnu-ndo quìde-ndo nchaa tnúhu ní cáháⁿ ndí Moisés nǔu xǎⁿ ndécú vǎha-ndo, te càchí-ndó sǎ ìo càhnu cuu-ndo sá ndécú ndìhi-ndo Yá Ndiöxí. ¹⁸ Te cùtnuní ìní-ndó nchaa nacuáa cuìní Yá Ndiöxí cada-ndo, te sá dúcáⁿ nchìcúⁿ nihnu-ndo quìde-ndo nacuáa càháⁿ tnúhu-áⁿ xǎⁿ cùtnuní ìní-ndó nchaa sá ìo-gá váha xìnì ñuhu-xi cada-ndo. ¹⁹ Te càchí-ndó sǎ ìo váha xìnì-ndó cànuichi-ndo nchaa ñáyi ñá túú cùtnuní ìní-xi, te càchí tucu-ndo sǎ ìo váha xìnì-ndó nà canu ichi-ndo nchaa ñáyi ndècu ichi cuehé ichi duha. ²⁰ Te sànu ichi-ndo nchaa ñáyi ío ñì dǎquí-xi, ndìhi nchaa ñáyi vitna ta tècú tnùnì nchaa sá vǎha, te ducaⁿ quìde-ndo chi ndècu ndìhi-ndo nchaa tnúhu ní chídó tnùnì ndí Moisés, te tnúhu-áⁿ cúú-xí tnúhu ndáá, chi sànu ichi ñaha-xi xii-ndo nacuáa cada-ndo. ²¹ Te nchòhó dàcuaha-ndo ñáyi nàcuáa cadá-yu, te mee-ndo ñá túú dàcuaha-ndo cada-ndo nchaa nacuáa tàú-xi cunduu, te xǎhaⁿ-ndo xii-yu sá vǎ cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúú cǎháⁿ ndìhi-güedé ñáyi dǎhí te núu ñá díú ñàdǎhí-güedé cúú-yu, te ducaⁿ-ni cuè ñáyi dǎhí, vá cúú cǎháⁿ ndìhi-yu téé te núu ñá díú yǎ-yu cùu-güedé. Te nchaa sá xǎhaⁿ-ndo vǎ cúú càda ñáyi te mee-ndo quìde-ni-ndo, te xǎhaⁿ-ndo xii-yu

sá vǎ cánèhé-yu sá yíñùhu núú nchàa sá càchí-yu cùu ndiòxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te càchí-ndó sá ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuáa ní cáháⁿ ndíi, te sá dúcáⁿ quide-ndo-áⁿ te dàquee tíhú-ndó Yǎ Ndiòxí. ²⁴ Te quèe ndáá-xi nàcuáa càháⁿ-xi núú tütú Yǎ Ndiòxí nàcuáa quide-ndo-áⁿ núú càchí-xi sá ncháá ñǎyiu ñá túú cùu ñáyiu isràél càháⁿ cuèhé-yu cuèndá Yǎ Ndiòxí sá cuèndá-ndó.

²⁵ Te nchòhó ñáyiu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcáⁿ te núu quide-ndo nchaa nacuáa ní cáháⁿ ndíi Moisés. Dico núu ñá túú quide-ndo nchaa nacuáa ní cáháⁿ ndíi ña, te ñá túú nàndíhi-xi sá cúú-ndó ñáyiu isràél cuèi ndècu seña ñii-ndo. ²⁶ Te nchaa ñáyiu ñá túú ndècu ndihí seña ñii-xi, te núu quidé-yu nchaa nàcuáa ní cáháⁿ ndíi Moisés, te cùú-yu dàtná cue ñáyiu ndècu ndihí seña ñii-xi, chi quidé-yu nchaa nàcuáa ní cáháⁿ ndíi. ²⁷ Te ñáyiu ñá túú ndècu ndihí seña ñii-xi, te núu na càdá-yu nchaa nàcuáa ní cáháⁿ ndíi Moisés, te ñáyiu-áⁿ cachí-yu sá ñà túú quide ndáá nchaa nchòhó ñáyiu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa càháⁿ tnúhu-áⁿ. ²⁸ Te nchòhó ñáyiu isràél, ñáyiu nchìcúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáyiu isràél, te mee-ndo ndècu seña ñii-ndo dico ñá túú quide-ndo nacuáa tàú-xi cada nchaa ñáyiu ndècu seña ñii-xi, te mee-ni seña-áⁿ sǎha-ndo ñii-ndo te ñá túú quide-ndo nacuáa cuèní Yǎ Ndiòxí cada-ndo. ²⁹ Te nchaa ñáyiu sàndáá

ndisa iní-xi Yá Ndiöxí, ñáyiú-áⁿ cúú ndisá-yu ñáyiú isràél, te sa ní nduu ndoo ní nduu nine iní-yu chi Espíritú Yă Ndiöxí ducaⁿ ñi quide-xi, dico ñá díú sã sãha-yu señá ñí-yu dàtná ní cachí ndí Moisés. Te ñáyiú-áⁿ cúú vãha iní ñáhá Yă Ndiöxí xii-yu cuëi ñá túú càháⁿ váha tnàha ñáyiú-yu cuèndá-yu.

3

¹ Te sá dúhá càháⁿ-í te ío dava ñáyiú quesàhá-yu sá ííⁿ-ní cùu ñáyiú ñá túú cùu ñáyiú isràél ndíhi nchoo ñáyiú isràél, te quesaha tùcú-yu sá ííⁿ-ní quide tucu-xi cuëi na cuãha àdi vá cuãha señá ñí-yu. ² Dico yúhú càchí-í sá ncháá ñáyiú isràél ío-gá cúnúú-yu, chi ío títí núú sã vãha ní quide ñaha Yă Ndiöxí xii-yu, chi ní sãñaha-gã tnúhu-gá ndécú ndíhí-yu. ³ Te davá-yu ñá túú cuèni-yu cada ndáá-yu, dico ñá díú sã xíãⁿ te cùyica iní Yă Ndiöxí ñá túú quide ndáá-gá. ⁴ Dico ñáhá chi xini ñuhu-xi sá ncháá ñáyiú cada cuèndá-yu sá Yă Ndiöxí cúú-gã Yaá quidé ndáá cuiti, te cuëi ncháá-yu na càchí-yu sá ñá túú quide ndáá-gá, dico mee-gã chi quide ndáá-ni-gá. Te núú tùtú-gá càháⁿ-xi nàcuáa ní xáhaⁿ ííⁿ téé ní xíndecu ndéé sanaha xii-gá, te duha ní xáhaⁿ-dë:

Yòhó Dútú Ndiöxí, cùtnuní iní ñáyiú sá ío ndáá càháⁿ-n,
te cùnuu nahi-ni tnúhu-n cuëi òré càchí ñáyiú sá ñá túú càháⁿ ndáá-n.
Duha ní xáhaⁿ téé ndéé sanaha-ãⁿ xii-gá càchí-xi núú tùtú-gá.

⁵ Te cuèndá nchaá sá cuèhé sá dúhá quide ñáyiú, xíãⁿ cútnuní iní-yu sá Yă Ndiöxí cúú-gã Yaá ío váha

quìde ndáá, chi mee-gă ñá túú dùcaⁿ quide-gá. Te cuëi ducaⁿ dico vá cání iní-yu sá Yă Ndiöxí ñá túú quide ndáá-gá sá dándòho ñaha-gá xií-yu na sàá nduu, te núu ducaⁿ na càni iní-yu, te sàni iní-yu dàtná sání iní cue ñáyiu ñá túú ndècu ichi-gá. ⁶ Te vá dúcáⁿ càni iní-yu, chi núu Yă Ndiöxí ñá túú quide ndáá-gá ñá, te vá cúú càda ndáá-gá nchaa cuéchi cue ñáyiu ñuyíú-a te núu ducaⁿ.

⁷ Te núu yúhú ná càni iní-í cáháⁿ-í ìⁿ tnúhu ndehnde, te sá tnúhu-áⁿ te cani tucu iní-í sá quidé càhnu-gá-í tnúhu ndáá tnúhu Yă Ndiöxí, te sá dúcáⁿ ná cáháⁿ-í te cani tucu iní-í sá vă cúú cǎháⁿ Yă Ndiöxí sá ndécú cuéchi-í. ⁸ Te núu na càni tucu iní-í sá văha-gá cada-í nchaa sá cuèhé sá dúhá cuendá Yă Ndiöxí cada-gá sá văha, dico ñá ndáá. Te ió ñáyiu càháⁿ cuèhé cuendá-í te cǎchí-yu sá díú-ní dùcaⁿ dacuaha-í ñáyiu dico ñá ndáá sá dúcáⁿ dànehé-í-yu, te ñáyiu-áⁿ nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáyiu ñuyíú-a ndècuéchi-yu

⁹ Te vitna cǎchí dava ñáyiu sá ìo-gá cúnùu nchoo cue ñáyiu isràél dàcúúxí dàva-gá ñáyiu, dico yúhú cǎchí-í sá ñǎhá, te sa ní cachí tnúhu ndáá-í xii-ndo sǎ nchàa ñáyiu ndècuéchi-yu cuëi ñáyiu isràél te cuëi ñáyiu ñá túú cùu ñáyiu isràél. ¹⁰ Te núú tütú Yă Ndiöxí cǎchí-xi:

Vá yǎo ìⁿ quide ndáá,

¹¹ te ni vá yǎo ìⁿ tècú tnùní tnúhu váha,

te ni vá yǎo ìⁿ nànducu nihnu Yă Ndiöxí.

¹² Chi ncháa-yu ñá túú nchìcúⁿ nihnú-yu ichi váha, te ncháa-yu cùú-yu ñáyiu xǎndecu neñúú sá cúú-xí Yă Ndiöxí.

Te ni ìⁿ-yu ñá túú quidé-yu ìⁿ sá vǎha.

13 Te cada iní-ndó sǎ yúhǔ-yu cùu-xi datná cúú ìⁿ
yaú núú yíndǔxi ndíyí núú ìo ndehe sàháⁿ,
te ducaⁿ sǎtnahá-xi cùu yuhú-yu, chi ío càháⁿ
cuèhé-yu, te mee-ni dándahú-yu nchaa
tnàha ñáyiú-yu.

Te cada iní-ndó sǎ vènenú cóo yíhí yùhú-yu chi
mee-ni càháⁿ úhú-yu cuèndá tnàha ñáyiú-yu.

14 Te ío iní-yu càháⁿ úhú tnáhǎ-yu.

15 Te àúⁿ nǎ cuu àúⁿ nǎ xǎⁿ xǎsahni tnàhá-yu.

16 Te nchaa núú xícá cùú-yu quide úhú iní-yu
nchaa tnàha ñáyiú-yu nàcuáa ndìhú iní
ñáyiú-áⁿ.

17 Te ñá túú cuiní-yu cundecu ndìhi tnàha váha-yu.

18 Te ñá túú sàni iní-yu canehé-yu sá yíñùhu núú Yǎ
Ndiǒxí.

Duha quidé-yu càchí-xi núú tütú-gá.

19 Te cùtnuní iní-ó sǎ nchaa tnúhu ní chídó tnùní
ndíi Moisés cúú-xí cuèndá nchaa ñáyiú nchìcúⁿ
nihnu nchaa tnúhu-áⁿ. Te tnúhu-áⁿ cúú-xí cuèndá
sá vǎ yǒo tnàhí cachí sá ñà túú cuèchi-xi, te ducaⁿ te
nchaandi túhú ñáyiú cutnùní iní-yu sá ná chǎhu-yu
nchaa sá quidé-yu núú Yǎ Ndiǒxí. 20 Te ducaⁿ
càda-xi chi ni ìⁿ ñáyiú vá càchí-ó sǎ vǎ cùndècu
cuèchi-yu núú Yǎ Ndiǒxí cuèndá-ni sá nchìcúⁿ ni-
hnú-yu nchaa tnúhu sá ñí chídó tnùní ndíi Moisés,
te tnúhu-áⁿ càchí tnúhu-xi cuèndá-ni sá cùtnuní
iní-ó sǎ ndécú-ó ìchi cuehé ichi duha.

*Te núu na quindáá iní-ó Xǐtohó Jesucristú te
naníhí tàhú-ó*

21 Te vitna ní cutnùní iní-ó sǎ ñà díú sǎ cádá-ó
nchaa nacuáa ní cáháⁿ ndíi Moisés cudùu-o núú

Yă Ndiöxí, chi mee-gă quidé cùḍi-u-o núú-gă. Te núú tütú ndí Moisés ndíhi núú tütú cue téé ní xóo cáháⁿ tnúhu Yă Ndiöxí ndéé sanaha càháⁿ-xi nàcuáa cada ñaha-gă xii-o vitna. ²² Te ducaⁿ cùḍi-u-o núú Yă Ndiöxí te núu na quëndáá iní-ó Xítóhó Jesucristú. Te ḍi-u-ni ducaⁿ cùḍi-u nchaa ñáyiu ñuyíú te núu na quëndáá iní ñáhă-yu xii-gă, chi ñⁿ-ni cùu-o nchaa-o sá cúú-xí Yă Ndiöxí. ²³ Chi nchaá-yu ndècu cuéchi-yu, chi ñă ñⁿ-yu quidé-yu nàcuáa cáháⁿ Yă Ndiöxí sá cúú-yu ñáyiu quide váha. ²⁴ Dico Yă Ndiöxí ío váha iní-gă chi ní quide ñaha-gă xii-o ñⁿ sá váha, chi ḍicó-ni ducaⁿ ñⁿ quide-gă nàcuáa vá cùndècu-gă cuéchi-o núú-gă, chi Xítóhó Jesucristú ní sati ñíñí-gă te ní xíhí-gă, te ducaⁿ ñⁿ yáha-gă cuendá sá vă cùndècu-gă cuéchi-o. ²⁵ Te Yă Ndiöxí ní taxi ndecu-gă Xítóhó Jesucristú núú ñăyiu ñuyíú-a, te ní xíhí-gă sá cuendá nchaa yícá cuéchi-yu, te ducaⁿ ñⁿ cuu cuendá sá ncháá ñăyiu na quëndáá iní ñáhá xii-gă te vá náchăhu-yu cuéchi-yu núú Yă Ndiöxí. Te Yă Ndiöxí ní quide ndee iní-gă nchaa sá cuéhé sá dúhá ñⁿ quide cue ñáyiu ní x̄ndecu ndéé sanaha. Te x̄áⁿ ní xíhí Xítóhó Jesucristú cuendá cutnùní iní-ó să Yă Ndiöxí cúú-gă Yaá ío váha quide ndáá cuéi ducaⁿ ñⁿ quide ndee iní-gă nchaa sá ñⁿ quide cue ñáyiu-áⁿ. ²⁶ Núu x̄áⁿ vitna ní cutnùní ndisa iní-ó să quidé ndăá-gă, te quide-gă sá cué ñáyiu vá cùndècu-gă cuéchi-yu núú-gă, te núu na quëndáá iní-yu Xítóhó Jesucristú.

²⁷ Te vitna vá càchí-ó să ío càhnu cuu-o cuendá sá ñă túú-gă cuéchi-o ndècu núú Yă Ndiöxí, te ducaⁿ ñă túú-gă cuéchi-o ndècu núú-gă cuendá sá sàndáá iní-ó Xítóhó Jesucristú, te ñă díú să cuendá nchaa

tnúhu ní cáháⁿ ndíi Moisés. ²⁸ Te cùtnuní iní-ó sǎ nděda-ni càa ñáyiu vá cùndècu-gǎ cuéchi-yu núú Yǎ Ndiǒxí te núu na quìndáá iní-yu Xítóhó Jesucrìstú cuèi ní quidé-yu nchaa nàcuáa ní cáháⁿ ndíi Moisés àdi ñá túú ní quidé-yu.

²⁹ Te cùtnuní iní-ó sǎ Yǎ Ndiǒxí cúú-gǎ Ndiǒxí nchaandi túhú ñáyiu, te ñá díú mèe-ni Ndiǒxí ñáyiu isràél cúú-gǎ. ³⁰ Te ìndìi díi-gǎ cúú-gǎ Ndiǒxí, te nchaa ñáyiu sàndáá iní ñáhá xii Xítóhó Jesucrìstú te vá cùndècu-gǎ cuéchi-yu núú Yǎ Ndiǒxí cuèi cùú-yu ñáyiu isràél àdi ñá túú cùú-yu. ³¹ Te ñá díú sǎ sàndáá iní-ó Xítóhó Jesucrìstú te cachí-ó sǎ ñá túú nàndíhi nchaa tnúhu sá sánú ìchi ñaha xii-o nacuáa cada-o, te ñáhá chi sá dúhá sàndáá iní-ó-gǎ te xiǎⁿ nchìcúⁿ nihnu-o quide-o nacuáa càháⁿ tnúhu-áⁿ.

4

Cuèndá ndíi Àbrahám

¹ Te vitna na càchí tnúhu-í xii-ndo cuèndá ndíi Àbrahám téé ní cuu ñaní tnáhá-ó ñí xíndecu ndéé sanaha. ² Te ndíi-áⁿ ñá túú ní xíndecu cuéchi ndíi núú Yǎ Ndiǒxí, dico ñá díú cuèndá ìⁿ chiuⁿ ní quide ndíi ducaⁿ ñá túú ní xíndecu cuéchi ndíi núú-gǎ. Chi núu cuèndá ìⁿ chiuⁿ ní quide ndíi ducaⁿ ñá túú ní xíndecu cuéchi ndíi núú Yǎ Ndiǒxí ñá, te cada càhnu ndíi mee ndíi ni cùu, dico ñá díú núú Yǎ Ndiǒxí cada càhnu ndíi mee ndíi te núu ducaⁿ ñí quide ndíi. ³ Te chí dándàcu iní nàcuáa càháⁿ-xi núú tütú Yǎ Ndiǒxí núú càchí-xi: “Té Àbrahám ní sàndáá iní-dé Yǎ Ndiǒxí, te xiǎⁿ ní cachí-gǎ sá cúdu-dé núú-gǎ”, duha càchí-xi núú tütú-gǎ. ⁴ Te sá cúhúⁿ yǎhu ìⁿ téé quide chiuⁿ, te vá càchí-ó sǎ xiǎⁿ cúú-xí

ìⁿ táhú sǎ cúú-xí-dě chi yáhu tnàhí-dé cúú-xí. ⁵ Te vá yǎo ìⁿ ndàcu cada ìⁿ chiuⁿ nacuáa cudìu-xi núú Yǎ Ndiǒxí. Te ñá túú nǎ chùuⁿ xini ñuhu-xi cada ñáyiu te cudìu-yu núú-gǎ, chi xìni ñuhu-ni-xi sá quìndáá-ni iní-yu-gá. Te diu-gá càchí-gá sá ñáyiu ndècu ichi cuehé ichi duha vá cùndècu-gá cuéchi-yu núú-gǎ, te núu na quìndáá iní ñáhǎ-yu xii-gá. ⁶ Te diu-ni ducaⁿ ñí cáháⁿ ndíi Dàvíí, chi ní cachí ndíi sá ìo váha táhú nchaa ñáyiu ní cachí Yǎ Ndiǒxí cudìu núú-gǎ, dico ñá díú cuèndá ìⁿ chùuⁿ quidé-yu cudìu-yu núú-gǎ. ⁷ Te duha ní cachí ndíi: Váha táhú nchaa ñáyiu quìde cahnu iní Yǎ Ndiǒxí nchaa cuéchi-xi, te ñá túú-gǎ quidé cuèndá-gá nchaa sá cuèhé sá dúhá ñí quidé-yu.

⁸ Váha táhǔ-yu chi Yá Ndiǒxí càchí-gá sá ñà túú-gǎ cuéchi-yu.

Duha ní cachí ndíi Dàvíí.

⁹ Te ñá díú mèe-ni ñáyiu ngǔndecu sèñá ñì-xi ducaⁿ vǎha táhǔ-yu, chi tnàhá ñáyiu ñá túú ngǔndecu sèñá ñì-xi ducaⁿ vǎha táhǔ-yu. Te sa nàha-o sá Yǎ Ndiǒxí ní cachí-gá sá cúdìu ndíi Àbrahám núú-gǎ cuèndá sá ni sàndáá iní ñáhá ndíi xii-gá. ¹⁰ Te cunaha-ndo sǎ dǐhna-gá ní cachí Yǎ Ndiǒxí sá cúdìu ndíi Àbrahám núú-gǎ te dǎtnùní ngǔndecu sèñá ñì ndíi. ¹¹ Te ní ngǔndecu sèñá ñì ndíi cuèndá xǐǎⁿ cuu-xi ìⁿ sèñá sá cúdìu ndíi núú Yǎ Ndiǒxí. Te ndéé cútnàhá vátá ngǔndecu-gá sèñá ñì ndíi, te sa cùdìu ndíi núú-gǎ chi ní sàndáá iní ñáhá ndíi xii-gá. Te sá dúcáⁿ ñà túú ndècu sèñá ñì ndíi cútnàhá ní sàndáá iní ndíi Yá Ndiǒxí xǐǎⁿ ní

cuu ndíi dàtná ìⁿ díhí dütú nchaa ñáyiú sàndáá iní ñáhá xii-gá, ñáyiú ñá túú ní ngündecu sèñá ñii-xi, te cùdiú-yu núú-gă. ¹² Te ndíi Àbrahám ní cuu tucu ndíi dàtná ìⁿ díhí dütú nchaa ñáyiú ní ngündecu sèñá ñii-xi, dico ñá díú cuendá-ni sá ñi ngündecu sèñá ñii-yu cùu ndíi díhí dütü-yu, chi cuendá sá sàndáá iní-yu Yá Ndiöxí nchícúⁿ nihnú-yu nàcuáa ní quide ndíi ní sàndáá iní ñáhá ndíi xii-gá ndéé cùtnàhá vátá ngündecu-gá sèñá ñii ndíi.

Yá Ndiöxí cada-gá nchaa nàcuáa ní cachí-gá te núu na quindáá iní-ó-gă

¹³ Te Yá Ndiöxí ní xáhaⁿ-gă xii ndíi Àbrahám sá ndúú tǎhú ndíi cunuu ndíi ñuyíú, ndíi cue déhe ndíi, ndíi nchaa dava-gá cue ñaní tnáhá ndíi vitna cacu túu. Te ducaⁿ ñi xáhaⁿ Yá Ndiöxí xii ndíi ndíi cue ñaní tnáhá ndíi, chi ní sàndáá iní ñáhá ndíi xii-gá núu xíáⁿ ní cudíu ndíi núú-gă. Te ducaⁿ ñi xáhaⁿ-gă xii ndíi dico ñá díú cuendá sá ñi quide ndíi nàcuáa ní xáhaⁿ Yá Ndiöxí xii ndíi Moisés cada ñáyiú ndéé cuéé-gă. ¹⁴ Te núu mee-ni ñáyiú nchícúⁿ nihnu quide nàcuáa ní cáháⁿ ndíi Moisés ní ndúu tǎhü-yu cunúú-yu ñuyíú-a ni cùu ña, te ñá túú xini ñuhu-xi quindáá iní-ó Yá Ndiöxí, te ñá túú nàndíi tnúhu ní xáhaⁿ Yá Ndiöxí xii ndíi Àbrahám ní cùu te núu ducaⁿ. ¹⁵ Te núu ìⁿ ñáyiú ñá túú quide nàcuáa càháⁿ tnúhu sá sánú ìchi ñaha xii-o nàcuáa cada-o te nacháhu-yu sá dúcáⁿ quidé-yu. Te núu ñá túú tñühu sá sánú ìchi ñaha-xi xii-o nàcuáa cada-o ni cùu ña, te ñá túú cuéchi-o ni cùu.

¹⁶ Te ducaⁿ ñi xáhaⁿ Yá Ndiöxí xii ndíi Àbrahám nàcuáa cada-gá, chi cuendá sá ni sàndáá iní ñáhá ndíi xii-gá. Te ducaⁿ ñi quide-gá chi ío váha

iní-gá, dico ñá díú sǎ ñⁿ chiuⁿ ni quide ndíi ducaⁿ ñí xáhaⁿ-gǎ. Te sá dúcáⁿ ñí cuu te cùu-xi ñⁿ tnúhu ndáá sá cúu-xí nchàa ñaní tnáhá ndíi, ñáyíu sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ni cuendá nchaa ñaní tnáhá ndíi nchìcúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñí cuu ndíi dàtná ñⁿ díhí dǔtú cue ñáyíu sàndáá iní ñáhá xii Yá Ndiöxí. ¹⁷ Te núú tùtú Yá Ndiöxí càháⁿ-xi nàcuáa ní xáhaⁿ-gǎ xii ndíi, te duha ní xáhaⁿ-gǎ: “Yòhó té Àbrahám ní quide ñaha-í xii-n dàtná ñⁿ díhí dǔtú cue ñáyíu xǐndecu nihíi ñuyíú.” Duha ní xáhaⁿ Yá Ndiöxí xii ndíi, càchí-xi núú tùtú-gá. Te Yá Ndiöxí náhá ndáá-gá sá cádá-xí nàcuáa ní xáhaⁿ-gǎ xii ndíi Àbrahám, te diu-ni-gá cúu Yáa ní sàndáá iní ndíi, te diu-ni-gá dándòto-gá ñáyíu ní xíhí, te diu-ni-gá quidé tá ngǔndecu nchaa sá vǎtá cǔndècu-gá ñuyíú-a.

¹⁸ Te Yá Ndiöxí ní xáhaⁿ-gǎ xii ndíi Àbrahám sá ïo cuéhé dǎhe ndíi coo, te ío ní sàndáá iní ndíi nàcuáa ní xáhaⁿ-gǎ dico ñá túú ní cùtnuní iní ndíi nása cada-gá, chi ío ní sahnu ndíi. Te cuendá sá dúcáⁿ ïo ní sàndáá iní ndíi tnúhu ní xáhaⁿ-gǎ nùu xíǎⁿ ní cuu ndíi díhí dǔtú vǎi ñáyíu xǐndecu nihíi ñuyíú.

¹⁹ Te ndíi Àbrahám ñùhu ndíi ñⁿ ciendú cuía cǔtnàhá ducaⁿ ñí xáhaⁿ Yá Ndiöxí xii ndíi, te ní cutnùní iní ndíi sá ñà túú tàhú ndíi sá cóo dǎhe ndíi ndíi ñadìhí ndíi ndíi Sǎrá, chi ndíi ndùú-yu sa ní sahnu vǐhí-yu, te cuèi ducaⁿ dico ní sàndáá-ni iní ndíi nàcuáa ní xáhaⁿ Yá Ndiöxí. ²⁰ Te ñá túú ní sàni ñⁿ sàni úú iní ndíi nàcuáa ní xáhaⁿ Yá Ndiöxí cada-gá sá cúu-xí ndíi, chi da uuⁿ-gá váha ní sàndáá iní ndíi nàcuáa

ní xáhaⁿ-gă, te ní cachí ndíi sá ïo cãhnu cuu-gă. ²¹Te ní cutnùní ndáá iní ndíi sá Yă Ndiöxí ndácú-gă quidé-gă nchaa sá cãháⁿ-gă. ²²Te sá ni sàndáá iní ndíi nàcuáa ní cãháⁿ Yă Ndiöxí, núu xíãⁿ ní cachí-gă sá cúu ndíi ìⁿ tée ñá túú cuěchi-xi núú-gă.

²³Te ní ngódó tnùní núú tütú Yă Ndiöxí cuendá ndíi Àbrahám sá ñi cachí-gă sá ñà túú cuěchi ndíi núú-gă, te ñá díú-ní cuendá méé ndíi ni ngódó tnùní núú tütú-gă. ²⁴Chi tnàhá cuendá-ó nchaa-o ní ngódó tnùní núú tütú-gă. Te cãchí-gă sá ñà túú cuěchi-o núú-gă chi sàndáá iní-ó-gă, te ðiu-gă cúú-gă Yaá ní dándótó ñàha xii Xítohó Jesucristú Yaá cúú Xítohó-ó. ²⁵Te Yá Ndiöxí ní cachí-gă sá díú Xítohó Jesucristú cuú-gă cuendá nacháhu-gă nchaa cuěchi-o. Te ní xíhí-gă te ní ndoto-gă cuendá nchaa-o vă cùndècu-gă cuěchi-o núú Yă Ndiöxí te núu na quíndáá iní-ó-gă.

5

Ío váha tnàhá ñáyiu cãchí Yă Ndiöxí sá ñà túú cuěchi-xi

¹Te vitna, ñá túú-gă cuěchi-o ndècu núú Yă Ndiöxí chi sàndáá iní-ó Xítohó Jesucristú, te ío váha ndècu ndíhi-o Yá Ndiöxí vitna sá cuendá Xítohó Jesucristú. ²Te cuendá sá ni sàndáá iní-ó Xítohó Jesucristú xíãⁿ ðiu-gă ní quide ní ngùndecu váha-o núú Yă Ndiöxí, te ducaⁿ-ni cùndecu-o, te ío cùdíí iní-ó chi ndècu ndíhi-o tnúhu ndee ìní sá sàá nduu ngùndecu-o núú ïo váha cãa ndecu Yá Ndiöxí. ³Te ñá díú-ní sã cuendá sá ndúú tãhú-ó cùndecu-o núú ndécú-gă cùdíí ìní-ó, chi cùdíí ìní-ó ndòho-o cuendá-gă, chi cùtnuní iní-ó sã núu na ndòho-o

cuendá-gá te cunduu càhnu-gá iní-ó, ⁴ te núu cùu-o ñáiyu ta quide cahnu-gá iní-xi te cùtnuní sá cúú-ó ñáiyu quide váha, te núu cùu-o ñáiyu quide váha te uuⁿ-gá tá ngündecu ndìhi-o tnùhu ndee iní cuáháⁿ sá cádá vâha ñaha Yá Ndiõxí xii-o. ⁵ Te núu ducaⁿ te vá ñⁿ ndùu ndixi cuéchi iní-ó sã ndécú ndìhi-o tnùhu ndee iní ngündecu váha-o. Te Espíritú sá ñí taxi Yá Ndiõxí ndécú ndìhi-o xiãⁿ quidé-xí cùtnuní iní-ó sã ïo cùu iní ñáhá Yá Ndiõxí xii-o.

⁶ Te nchoo ñà túú vëdana ná ní ndàcu-o cada-o cuendá dácácu nihnu-o mée-o, dico Xítohó Jesucristú ní xíhí-gá cuendá-ó, ndìhi cuendá nchaa dava-gá ñáiyu ñá túú tnàhá tnùhu ndìhi Yá Ndiõxí, te ní xíhí-gá mei ndùu taú-xi cuú-gá. ⁷ Te cudana-ni núu xíhí ñⁿ ñáiyu sá cuendá ñⁿ ñáiyu quide ndáá, te áma xíhí tucu ñⁿ-yu sá cuendá ñáiyu quide váha tnàha ñáiyu-xi. ⁸ Te Yá Ndiõxí ní quide-gá sá nchóó cùtnuní iní-ó sã ïo cùu iní ñáhá-gã xii-o, chi cùtnàhá ndécú-ó ìchi cuehé ichi duha te ní tendaha-gã Xítohó Jesucristú ní quixi-gá ñuyíú-a ní xíhí-gá cuendá-ó. ⁹ Te sá cuendá sá ñí xíhí Xítohó Jesucristú xiãⁿ ñá túú-gã cuéchi-o ndècu núú Yá Ndiõxí, te vitna ní cutnùní ndáá iní-ó sã vã dáquihíⁿ ñáhá-gã Yá Ndiõxí xii-o nùú ùhú núú ndàhú sá cuendá Xítohó Jesucristú. ¹⁰ Te cùtnàhá ñá túú tnàhá tnùhu-o ndìhi Yá Ndiõxí ní cùu ní xíhí Xítohó Jesucristú Yaá cúú Dëhe-gá cuendá cuu váha iní ñáhá-gã xii-o, te ducaⁿ te nduu táhú-ó cùndecu-o ndìhi-gá ñí caa ñí quíhíⁿ cuendá sá ñí ndoto Xítohó Jesucristú. ¹¹ Te ndètu-o sáá nduu ngündecu-o ndìhi-gá ñí caa ñí quíhíⁿ, te ñá díú-ní xiãⁿ quidé-ó chi tnàhá cúdíⁿ iní-ó Yá Ndiõxí, chi Xítohó Jesucristú

ní quide-gá ducaⁿ cùdíí ìní-ó-gă, te ðiu-ni Xítóhó Jesucrìstú ní quide-gá ní nucúndecu váha-o ndìhì Yá Ndiõxí.

Nàcuáa ní quide ndíi Àdán ndìhì nàcuáa ní quide Xítóhó Jesucrìstú

¹² Te ndíi Àdán ñá túú ní quide ndáá ndíi núú Yă Ndiõxí nũu xǎⁿ ní ngúndecu nchaa sá cuèhé sá dúhá ñùyíú-a, te sá cuendá nchaa sá cuèhé sá dúhá quide ñáyíu xǎⁿ xìhí-yu, te nchaá-yu xìhí-yu chi nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dàtnùnì ní ngúndecu nchaa tnúhu sá ñí chídó tnùnì ndíi Moisés nàcuáa ní xáhaⁿ Yă Ndiõxí cada ñáyíu, te nchoo cùtnunì iní-ó sǎ nũu ñá túú tnũhu sá sánú ìchi ñaha xii-o nacuáa cada-o, te ñá túú cuèchi-o sànuu. ¹⁴ Te ndéé cúnàhá ní xíndecu ndíi Àdán ní quesaha-xi xìhí ñáyíu, te ducaⁿ-ni xìhí-yu ndéé ní sáá nduu ñí xíndecu ndíi Moisés. Te ducaⁿ ñí xìhí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-áⁿ ñà túú ní sàndáá iní ndíi nàcuáa ní xáhaⁿ Yă Ndiõxí cada ndíi. Te ndíi Àdán ní cuu ndíi ìⁿ téé cùu cahnu ní xíndecu ñuyíú-a, te sátá dúcáⁿ te ní quixi Xítóhó Jesucrìstú te Yáá-áⁿ ìo-gá càhnu cuu-gá.

¹⁵ Te sá ñí quide ndíi Àdán te vá càchí-ó sǎ ìⁿ-ní cùu-xi ndìhì sá ñí cachí Yă Ndiõxí nduu táhú-ó vìtna. Te sá ñà túú ní quide ndáá ndíi xǎⁿ nchaa ñáyíu xìhí-yu, dico Yá Ndiõxí ío váha iní-gá chi ío váha ní quide-gá sá cúú-xí nchàa nchoo ñáyíu ndècu ñuyíú-a, chi òcò ducaⁿ ñí cachí-gá sá nánhí tàhú-ó, te ìⁿ òcò-ni téé tnàhá-dé ío váha ní quide-dé sá cúú-xí-ó, te téé-áⁿ cúú-dě Xítóhó Jesucrìstú. ¹⁶ Te

sá nǐ quide ñⁿdii-ni ndíi Àdán ñá túú ñⁿ-ni cuu-xi ndíhi sá nǐ quide Yá Ndiöxí sá cúú-xí-ó, chi ndíi-án ñá túú ní quide ndáá ndíi núú-gă. Te sá dúcáⁿ nǐ quide ndíi te xíăⁿ ní cuu-xi cuéchi díhna nuu nǐ quide ndíi, núu xíăⁿ ní cachí Yă Ndiöxí sá cuè ñáyiu quíhíⁿ-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gă ní quide sá cuè ñáyiu naníhí tàhú-yu dìcò-ni ducaⁿ, te ducaⁿ te vá cùndècu-gá cuéchi-yu núú-gă cuèi ío vâi cuéchi-yu. ¹⁷ Te sá dúcáⁿ ñà túú ní quide ndáá ñⁿdii-ni ndíi Àdán-áⁿ núú Yă Ndiöxí, xíăⁿ ní quide-xi xihí nchaa ñáyiu. Te sá cuendá sá nǐ quide ñⁿdii-ni Xítohó Jesucristú xíăⁿ ío vâha ní quide ñaha Yă Ndiöxí xii ñáyiu, chi dìcò-ni ducaⁿ nǐ nduu táhũ-yu cùdiú-yu núú-gă. Te nchaa ñáyiu ducaⁿ cùdiu núú-gă nduu táhũ-yu cunúú-yu ndíhi Xítohó Jesucristú cuendá sá nǐ quide-gá sá vâha sá cúú-xí-yu.

¹⁸ Te sá dúcáⁿ nǐ quide ndíi Àdán ñá túú ní quide ndíi nàcuáa ní xáhaⁿ Yă Ndiöxí xii ndíi ñⁿ xito, núu xíăⁿ ní cachí-gá sá ncháá ñáyiu tàú-yu nacháhu-yu nchaa cuéchi-yu, dico Xítohó Jesucristú ní quide-gá ñⁿ sá vâha cuendá nchaa ñáyiu vá cùndècu-gá cuéchi-yu núú Yă Ndiöxí te núu na quíndáá iní ñáhã-yu xii-gá, te ducaⁿ te cundecú-yu ndíhi-gá ni caa ni quíhíⁿ. ¹⁹ Te sá ñà túú ní sàndáá iní ñⁿdii-ni ndíi Àdán nàcuáa ní xáhaⁿ Yă Ndiöxí xii ndíi, xíăⁿ ní nguínchicúⁿ nihnu nchaa ñáyiu quidé-yu nchaa sá cuèhé sá dúhá. Te ducaⁿ ñⁿdii-ni Xítohó Jesucristú ní quide-gá nàcuáa ní xáhaⁿ Yă Ndiöxí cuendá sá Yă Ndiöxí cachí-gá sá cúdiú-yu núú-gă.

20 Te Yá Ndiöxí ní xáhaⁿ-gã xii ndíi Moisés nàcuáa cada ñáyíu, te sá cuendá tnúhu-áⁿ uuⁿ-gá ní ngüíta nchaa ñáyíu quidé-yu nchaa sá cuèhé sá dúhá, te Yá Ndiöxí uuⁿ-gá cundàhú iní ñáhá-gã xií-yu tucu. 21 Te sá cuendá nchaa cuéchi ñáyíu xíáⁿ xihí-yu, dico Yá Ndiöxí ío váha iní-gá chi diu-gá ní cachí-gá sá ncháá ñáyíu na tnàhá tnúhu ndihí ñaha xì-gá cudíu-yu núu-gã, te cundecú-yu ndihí-gá ni caa ni quíhíⁿ, te ducaⁿ chi Xítohó Jesucrístú ní quide-gá sá vâha sá cúu-xí-yu.

6

Ñáyíu ñá túu-gã ndécú ìchi cuehé ìchi duha ndècú-yu cuendá Xítohó Jesucrístú

1 Te sá dúcáⁿ quide Yá Ndiöxí, te vá cání ìní-ó cànchicúⁿ nihnu-ni-o ìchi cuehé ìchi duha, chi ñá díú sã cànchicúⁿ nihnu-o ìchi-áⁿ te ngóo càni ìní-ó sã ío-gá cundàhú iní ñáhá-gã xii-o. 2 Te vá cúu cànchicúⁿ nihnu-o ìchi cuehé ìchi duha, chi nchoo cùu-o datná cue ñáyíu sa ní xihí, núu xíáⁿ vá cúu-gã canchicúⁿ nihnu-o ìchi-áⁿ. 3 Te sa nàha-o sá cuendá sá ñí sandute-o quèe-xi sá tnàhá tnúhu-o ndihí Xítohó Jesucrístú. Te sá ñí sandute-o quèe tucu-xi sá cúu-ó datná ñáyíu ní xihí ndihí-gá. 4 Te ñá díú-ní sã ñí xihí-ó ndihí-gá chi quèe tucu-xi sá ñí nguíndüxi-o ndihí-gá te ní ndoto-o datná ní ndoto mee-gã ní dándótó ñaha Dútú Ndiöxí Yaá ío càhnu cuu, te ducaⁿ ñí cuu cuendá sá vâ cundècu-gá-ó datná ní xíndecu-o.

5 Te núu ìⁿ-ni cùu-o ndihí Xítohó Jesucrístú cuendá sá cúu-ó datná ñáyíu ní xihí ndihí-gá, te ndáá sá cúu-ó datná ñáyíu ní ndoto ní nguíndecu

váha dàtná ní ndoto mee-gă ní nucúndecu váha-gá. ⁶ Te nchoo nàha-o sá cúú-ó ñăyiu ío ndècu cuéchi-xi ni cùu, dico sátá ñi cuu-o dàtná ñăyiu ní xíhí dàtná ní xíhí Xítóhó Jesucristú núú cùrúxí, te ndéé dàvá-áⁿ ñi dáñá-ó nchàa ichi cuehé ichi duha ndècu-o ni cuu, te ñá túú-gă cúnùu sá cuèhé sá dúhá ìní-ó. ⁷ Chi nchaa ñăyiu ní xíhí ñá túú-gă ndécũ-yu ichi cuèhé ichi duha. ⁸ Te núu cùu-o datná ñăyiu ní xíhí dàtná ní xíhí Xítóhó Jesucristú ñá, te cùtnuní ndáá ìní-ó sà cùndècu-o ndihí-gá ni caa ni quíhíⁿ. ⁹ Te sa nàha-o sá Xítóhó Jesucristú ní xíhí-gá te ní ndoto-gá te vá ííⁿ ndùu ííⁿ quíú-gă te cuú-gá, chi ñá túú năgá sá cádá cùú-gá. ¹⁰ Te Xítóhó Jesucristú ní xíhí-gá ííⁿ xito-ni sá cuendá nchaa cuéchi nchoo ñăyiu ñuyíú, te vá ííⁿ ndùu-gá cuú-gá, te ndècu-ni-gá sá cúú-xí Yă Ndiöxí. ¹¹ Núu xíáⁿ nchòhó cada ìní-ndó sã dàtná sá ñi xíhí-ndó vă cùndècu-gá-ndó sà cúú-xí ichi cuehé ichi duha, chi ndècu-ná-ndó sã cúú-xí Yă Ndiöxí, chi ní tnahá tnúhu-ndo ndihí Xítóhó Jesucristú Yá cúú Xítóhó-ó.

¹² Te núu xíáⁿ vá dáñá-gă-ndó cúnùu ni ííⁿ sá cuèhé sá dúhá ìní-ndó cuendá sá vă cádá-gă-ndó ni ííⁿ sá cuèhé sá dúhá sàni ìní-ndó. ¹³ Te vá dáñá-ndó tàxi tnuní ñáhá ni ííⁿ sá cuèhé sá dúhá-áⁿ xii-ndo cuendá sá vă cádá-gă-ndó, te chí dáñá ná tàxi tnuní ñáhá Yă Ndiöxí xii-ndo, te chí dáñá ná chindee ñaha-gá cada-ndo mée-ni sá văha, te ducaⁿ te cada ìní-ndó sã cúú-ndó dàtná ñăyiu ní xíhí te ní ndoto ndècu. ¹⁴ Te ducaⁿ càda-ndo chi vá ndácú-gă ni ííⁿ sá cuèhé sá dúhá tàxi tnuní ñáhá-xí xii-ndo, chi Yá Ndiöxí cùndàhú ìní ñáhá-gă chíndèe ñaha-gá xii-ndo. Te ducaⁿ chi ñá túú-gă cúnùu nchaa tnúhu

sá ñĩ chídó tnùnĩ ndíi Moisés cada ñáyiu.

Ñáyiu nchícúⁿ nihnu sá vǎha

¹⁵ Te ñá díú sǎ cúndàhú iní ñáhá Yǎ Ndiǒxí xii-o chindee ñaha-gǎ ndihí sá ñà túú-gǎ cúnùu nchaa tnúhu ní chídó tnùnĩ ndíi Moisés, te cachí-ó sǎ cúú-ní cùndecu-o ichi cuehé ichi duha. ¹⁶ Te nchoo xíní-ó sǎ núu na cuǎha-o tnúhu cunu cuechi-o núú ìⁿ ñáyiu cuíní cunu cuechi-o núú-xi, te cùu-ná-ó ñáyiu xínu cuechi núú-yu te quide-o nchaa chiuⁿ tahú-yu. Te ducaⁿ sǎtnahá-xi cùu nchaa ñáyiu quide nchaa sá cuèhé sá dúhá chi tàxi tnuní ñáhá-nǎ-xi xií-yu, te díu nchaa xiǎⁿ dácuíta nihnu ñaha-xi xií-yu, te díu-ni ducaⁿ sǎtnahá-xi cùu nchaa ñáyiu sàndáá iní ñáhá xii Yá Ndiǒxí chi tàxi tnuní ñáhá-gǎ xií-yu, te quidé-yu nchaa sá vǎha nàcuáa cuíní méé-gǎ cada-yu. ¹⁷ Te nchòhó ducaⁿ ñĩ xóo cada-ndo nchàa sá cuèhé sá dúhá ní cùu, dico táxǎhu xii Yá Ndiǒxí chi vitna ñi yùhu ñi iní-ndó quide-ndo nchaa nacuáa càháⁿ tnúhu-gǎ sá ñĩ ngúndecu ndihí-ndo. ¹⁸ Te vitna ñá túú-gǎ táxi tnùnĩ ñáhá ñi ìⁿ sá cuèhé sá dúhá xii-ndo, te quide-ná-ndó nchàa sá vǎha tàuchiuⁿ Yá Ndiǒxí cada-ndo. ¹⁹ Te duha càháⁿ-í cuèndá cue ñáyiu xínu cuechi cuendá sá nchòhó tecú tnùnĩ-ndó nàcuáa ndùu tnúhu càháⁿ-í. Te nchòhó ní dáñá-ndó ñĩ taxi tnùnĩ ñáhá nchàa sá cuèhé sá dúhá xii-ndo, te ñá túú ní quide-ndo nacuáa ní cáháⁿ Yá Ndiǒxí cada-ndo chí da vìhi-gǎ ní quide-ndo, te díu-ni ducaⁿ chí dáñá ná taxi tnuní ñáhá Yá Ndiǒxí xii-ndo vitna cuendá cada-ndo mèe-ni sá vǎha nàcuáa cuíní méé-gǎ cada-ndo, te ducaⁿ te cuu-ndo ñáyiu quide ndáá cundecu núú-gǎ.

20 Te nchoo cǔtnàhá ní xóo cada-o nchàa sá cuèhé sá dúhá ñà túú ní xóo cada-o ñi ñⁿ sá vǎha cuìní Yǎ Ndiǒxí cada-o. 21 Te òicó sácáⁿnúú sǎñaha nchàa sá cuèhé sá dúhá-ǎⁿ te núu na càda-o, te ñi ñⁿ sá vǎha vá ñihí-ó te núu na càda-o nchaa xíǎⁿ, te òiu nchaa xíǎⁿ dácuíta nihnu ñaha-xi xì-o. 22 Te vitna ñá túú-gǎ cúú-ó ñǎyiu ndècu ichi cuehé ichi duha, chi cùu-ná-ó ñǎyiu quède nchaa nacuáa càháⁿ Yǎ Ndiǒxí. Te sá dúhá quède-o cuu ndisa-xi ñⁿ sá vǎha sá cúú-xí-ó, te cùu-o ñǎyiu quède ndáá ndécú-ó núú-gǎ vitna, te sáá nduu cùndecu-o ndìhi-gá ñi caa ñi quíhíⁿ. 23 Te nchaa sá cuèhé sá dúhá òicó dácuíta nihnu ñaha-xi xì-o, òico Yá Ndiǒxí ní quède-gá sá òicó-ñi ducaⁿ ndùu táhú-ó cùndecu-o ndìhi-gá ñi caa ñi quíhíⁿ, chi ní tnahá tnúhu-o ndìhi Xítóhó Jesucristú Yáá cúú Xítóhó-ó.

7

Cuèndá ñǎyiu tnǎndaha

1 Te nchaa nchòhó ñǎyiu ndècu ndìhi-í ichi Xítóhó Jesucristú sa nàha-ndo nacuáa càháⁿ tnúhu sá dánèhé ñáhá xì-o nacuáa cada-o cùndecu-o, chi tnúhu-án càháⁿ-xi dóho nchaa ñǎyiu xǐndecu vǐvú ñuyíú-a. 2 Te nchaa ñǎyiu òihí sa ndècu yí-xi, te òiu tnúhu-án dánèhé ñáhá-xí xì-yu sá vǎ dáñǎ-yu yí-yu, òico núu na cùú yí-yu te ñá túú-gǎ ná càháⁿ tnúhu-án cuèndá-yu. 3 Òico núu vátá cùú-gá yí-yu te ñá túú ndùu váha-xi naquehéⁿ-yu ingá téé, òico núu na cùú yí-yu te quendóo mèé-yu, te ñá túú nǎgá càháⁿ tnúhu sá dánèhé ñáhá xì-yu nàcuáa cadá-yu te ducaⁿ te cuu naquehéⁿ-yu ingá téé, te ñá túú cùu-xi ñⁿ cuéchi.

4 Te nchòhó cue ñáyiú ndècu ndìhì-í ichi Xítohó Jesucristú cúú-ndó dàtná ñáyiú ní xíhí dàtná ní xíhí-gá. Te xíáⁿ ñá túú-gă táxí tnùnì ñáhá nchàa tnúhu ní chídó tnùnì ndí Moisés xii-ndo. Te ducaⁿ ñí cuu cuendá nchòhó ngúndecu-ndo ndìhì Xítohó Jesucristú Yaá ní xíhí ní cùu te ní ndoto-gá. Te ducaⁿ ñí cuu cuendá nchaa nchoo ñáyiú ndècu ichi-gá cada-o nchàa nacuáa càháⁿ Yă Ndiöxí. 5 Te nchoo ñí xíndecu-o ìchi cuehé ichi duha, te tnúhu sá sánú ìchi ñaha xii-o nacuáa cada-o cùndecu-o cachí-xi sá ñá túú vâha cundecu-o ìchi-áⁿ, te nchoo dà uuⁿ-gá ní quide-o nchàa sá cuèhé sá dúhá sá dúcáⁿ càháⁿ tnúhu-áⁿ, te sá dúcáⁿ ñí quide-o te ta xíta nihnu-o cuăháⁿ ní cùu. 6 Te vitna cada iní-ó sá cúú-ó dàtná ñáyiú ní xíhí sá cúú-xí tnúhu sá dánèhé ñáhá xii-o nacuáa cada-o cùndecu-o, chi ñá túú-gă cúnùu-xi, te vitna mee-ñă Espíritú Yă Ndiöxí chíndèe ñaha-xi xii-o xinu cuechi-o núú-gă, te ñá díú cuendá nchaa tnúhu sá ñí ngúndéé ndéé díhna cada ñáyiú xínu cuechi-o núú-gă vitna.

Nchaa sá cuèhé sá dúhá ñùhu iní-í

7 Te cuèi duha càháⁿ-í dico vá cúú tnàhí càháⁿ-ó sá tnúhu sá sánú ìchi ñaha xii-o nacuáa cada-o cùndecu-o ñá díú tnúhu vâha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnúhu-áⁿ ní càhí tnúhu-xi xii-í, te ni ñá túú cùtnuní tucu iní-í núu vâha àdi ñá túú vâha sá nchídó iní-í sá ndécú ndìhì tnaha ñáyiú-o ni cùu te núu ñá túú tnúhu-áⁿ ní càhí-xi sá vă cúú cùu iní-í sá ndécú ndìhí-yu. 8 Te tnúhu-áⁿ ñí dánèhé ñáhá-xí xii-í sá vă cúú càda-í ni ìⁿ sá cuèhé sá dúhá, dico sá cuendá tnúhu-áⁿ uuⁿ-gá ducaⁿ ñí sani iní-í ní quide-í. Te núu ñá túú tnúhu sá sánú

ìchi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cútnàhá vátá nihí-gá-í tnúhu-áⁿ te ñá túú tnàhí ná sání ìní-í ndécù-í ní cùu, dico sátá ní níhí-í tnúhu-áⁿ te ní cutnùní iní-í sá ndécú cuèchi-í, te ta xíta nihnu-í cuáháⁿ ní cùu. ¹⁰ Te núu ní quide-í nchaa nàcuáa càháⁿ tnúhu-áⁿ te sa ndéé ama-gá naníhí tàhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáháⁿ ní cùu. ¹¹ Te sá xíí tnúhu-áⁿ xíáⁿ uuⁿ-gá ní cunuu nchaa sá cuèhé sá dúhá ní dándàhú ñáhá-xí xì-í te ní quide-í, te ta dàcuíta nihnu ñaha-xi xì-í cuáháⁿ ní cùu.

¹² Te tnúhu sá sánú ìchi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yá Ndiöxí, te ìⁿ ìⁿ tnúhu-áⁿ cúú-xí mèe-ni tnúhu váha, te ni ìⁿ tnúhu cuèhé tnúhu duha ñá túú ñùhu tnahá. ¹³ Te vá cúú cächí-í sá tnúhu váha-áⁿ ní quide-xi ta xíta nihnu-í cuáháⁿ ní cùu, chi nchaa sá cuèhé sá dúhá ní quide-í, xíáⁿ tá dàcuíta nihnu ñaha-xi xì-í cuáháⁿ ní cùu, te sá cuendá tnúhu váha-áⁿ ní cutnùní iní-í sá quidè-í nchaa sá cuèhé sá dúhá, te xíáⁿ tá xíta nihnu-í cuáháⁿ ní cùu. Te sá cuendá nchaa nàcuáa càháⁿ tnúhu sá sánú ìchi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tnúhu-áⁿ ní taxi Espíritú Yá Ndiöxí ndécú ndìhi-o cachí tnúhu-xi nàcuáa cada váha-o. Te nchoo cùu-o mee-ni ñáyiú yíca cuèchi, te tàxi tnuní ñáhá nchaa sá cuèhé sá dúhá xii-o ní cuu. ¹⁵ Dico nchoo tnàhá iní-ó càda-o nchaa sá vâha dico ñá túú quide-o, te da nchaa sá ñà túú tnàhá iní-ó càda-o quide-o, te ñá túú cùtnuní iní-ó nã cuendá ducaⁿ quide-o. ¹⁶ Te sá dúcáⁿ quide-o nchaa sá ñà túú tnàhá iní-ó, te xíáⁿ ndíxí túu iní-ó sã tnúhu sá dúcáⁿ sànu ichi ñaha xii-o nacuáa cada-o cùndecu-o

cuu-xi tnúhu ío váha. ¹⁷ Te cùtnuní iní-ó sǎ nchàa sá cuèhé sá dúhá ñùhu iní-ó, xǎⁿ quidé-xí dùcaⁿ quide-o sá ñà túú vǎha, te ñá díú sǎ cáhú ìní mée-ó dùcaⁿ quide-o. ¹⁸ Te cùu-o cue ñáyiu sàni cuehé sání dùha iní-xi, te cuìní-ó càda-o nchaa sá vǎha dico ñá túú ñìhí ndée-ó càda-o. ¹⁹ Te cuìní-ó càda-o nchaa sá vǎha dico ñá ndácú-ó, te ñá túú cuìní-ó càda-o datná quidé nchàa ñáyiu ndècu ichi cuehé ichi duha, chi ñáyiu-áⁿ mee-ni nchàa sá cuèhé sá dúhá quidé-yu, dico ñiu-ni nchaa xǎⁿ quidé-ó tnàhá-ó. ²⁰ Te sá dúcáⁿ quide-o nchaa sá ñà túú tnàhá iní-ó càda-o te ñá díú mèe-o ducaⁿ cahu iní-ó quide-o, chi nchaa sá cuèhé sá dúhá ñùhu iní-ó xǎⁿ quidé-xí dùcaⁿ quide-o.

²¹ Te ducaⁿ tnàhí yáha-o òré cuìní-ó càda-o sá vǎha, chi da mee-ni nchàa sá cuèhé sá dúhá quide-o. ²² Te ío cùdíí ìní-ó càda-o nchaa nacuaá càháⁿ Yǎ Ndiǒxí, ²³ te dìcò-ni sá ncháá sǎ cuèhé sá dúhá ñùhu iní-ó, xǎⁿ quidé-xí ngàni ñaha-xi xii-o ñá túú quide-o sá vǎha sàni iní-ó càda-o, te ducaⁿ yáha-o chi nchaa sá cuèhé sá dúhá-ǎⁿ cùnùu-xi taxi tnuní ñáhá-xí xii-o.

²⁴ ;Te ndàhú ní cuu nchoo! Chi vá yǒo ìⁿ ni ndàcu cada nacuaá vá táxí tnùní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxǎhu xii Yǎ Ndiǒxí sá Xìtohó Jesucristú ní quide-gá cuendá sá vǎ táxí tnùní ñáhá-gǎ ni ìⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó càda-o nchaa nacuaá càháⁿ Yǎ Ndiǒxí, dico núu nchaa sá cuèhé sá dúhá ná cùnùu-xi taxi tnuní ñáhá-xí xii-o, te ñiu-ni nchaa xǎⁿ cada-o.

8

Ñáyiú quìde nchaa nacuáa càháⁿ Espíritú Yá Ndiöxí

¹ Te vitna nchaa nchoo ñáyiú tnàhá tnúhu ndihí Xítohó Jesucristú vá cuíta nihnu-gá-ó, chi ñá túú-gá ndécú-ó ìchi cuehé ichi duha, chi mee-nă nchaa năcuáa càháⁿ Espíritú Yá Ndiöxí quidé-ó. ² Te Espíritú Yá Ndiöxí-ăⁿ táxí tnùní ñáhá-xí xì-o, te ducaⁿ chi ndècu ndihí-o Xítohó Jesucristú, te sá dúcáⁿ tàxi tnuní ñáhá Espíritú-gá xii-o nŭu xíăⁿ ñá túú-gá táxí tnùní ñáhá ñi ĩⁿ-gá sá cuèhé sá dúhá xì-o, te ducaⁿ quide Espíritú-gá cuendá sá vă cuíta nihnu-o, te diu-ni Espíritú-gá quidé-xí cuendá sá nchóó ndùu táhú-ó cùndecu-o ndihí-gá ni caa ni quíhíⁿ. ³ Te nchoo ñă ní ndàcu-o cada-o nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o, núu xíăⁿ tnúhu-ăⁿ ñă túú ní nihí ndéé-xí càda-xi cuendá sá nchóó vă cuíta nihnu-o. Dico Yá Ndiöxí ní tendaha-gá Déhe mee-gá ní quixi ñuyíú-a, te Yaá-ăⁿ cúú-gá ĩⁿ ñáyiú, te càa-gá dàtná cáá ñáyiú ndècu cuéchi-xi xĩndecu ñuyíú-a, te sá cuendá nchaa cuéchi nchaa nchoo ñáyiú xĩndecu ñuyíú-a ní quixi-gá, te ndéé dàvá-ăⁿ ñi quide-gá cuendá sá vă táxí tnùní ñáhá-gă ni ĩⁿ sá cuèhé sá dúhá xì-o. ⁴ Te ducaⁿ ñi quide-gá cuendá nchoo nchícúⁿ nihnu-o quide-o nacuáa càháⁿ tnúhu sá sánú ìchi ñaha xii-o nacuáa cada-o, chi ñá túú-gá cúnùu ni ĩⁿ sá cuèhé sá dúhá ìní-ó, chi Espíritú Yá Ndiöxí-nă táxí tnùní ñáhá-xí xì-o. ⁵ Te nchaa ñáyiú cùnùu nchaa sá cuèhé sá dúhá ìní-xi mee-ni xíăⁿ ñúhú ìní-yu te quidé-yu. Dico nchoo ñáyiú quide nchaa nacuáa cùní Espíritú Yá Ndiöxí ñúhú ìní-ó mēe-ni nacuáa càháⁿ

Espíritú-gá-áⁿ te quíde-o. ⁶ Te núu mee-ni nchàa sá cuèhé sá dúhá cùnūu iní-ó, te cuíta nihnu-o, dico núu mee-ni nchàa tnúhu càháⁿ Espíritú Yă Ndiǒxí cùnūu iní-ó, te ío váha cuu iní-ó cunde-cu-o ndihí-gá ni caa ni quíhíⁿ. ⁷ Te nchaa ñáyiū ñūhu iní mee-ni sá cuèhé sá dúhá cūu úhú iní-yu Yá Ndiǒxí, te ñá túú cuíní-yu cadá-yu nàcuáa càháⁿ-gá, te ni ñá ndácū-yu cadá-yu. ⁸ Te nchaa ñáyiū ducaⁿ cùnūu nchaa sá cuèhé sá dúhá ìní-xi-áⁿ ñà túú cùdiú-yu núu Yă Ndiǒxí.

⁹ Te nchòhó chi ñá túú-gă cùnūu sá cuèhé sá dúhá ìní-ndó, chi mee-nă nàcuáa càháⁿ Espíritú Yă Ndiǒxí quíde-ndó, te ducaⁿ quíde-ndo chi ndècu ndihí-ndo Espíritú-gá, te diu-ni Espíritú-gá-áⁿ ñí tendaha Xítóhó Jesucrístú véxi ndècu ndihí-o, te nchaa ñáyiū ñá túú ndècu ndihí Espíritú sá ñí tendaha Xítóhó Jesucrístú véxi ndècu ndihí-o ñá túú ndècu ndihí ñahá-yu xii-gá. ¹⁰ Te núu ndècu ndihí-ndo Xítóhó Jesucrístú, te cuèi na cūu yiquí cùñú-ndó sá cuèndá nchaa sá cuèhé sá dúhá íó ñuyíú-a, dico iní-ndó chi cunde-cu ndihí-xi Yá Ndiǒxí chi ñá túú-gă cuéchi-ndo ndècu núu-gă.

¹¹ Te núu ndècu ndihí-ndo Espíritú Yă Ndiǒxí Yaá ní dándótó ñàha xii Xítóhó Jesucrístú, te diu-ni-gá cada te ndoto yiquí cùñú-ndó sá tá xíta nihnu cuáháⁿ nūu na cūu-xi, te ducaⁿ chi ndècu ndihí-ndo Espíritú-gá.

¹² Te nchòhó ñáyiū ndècu ndihí-í ichi Xítóhó Jesucrístú, ñá túú-gă tàú-ndó cùnūu ni #ⁿ sá cuèhé sá dúhá ìní-ndó nàcuáa vá cùndècu-gá-ndó ìchi cuehé ichi duha. ¹³ Chi núu na cùnūu sá cuèhé sá dúhá ìní-ndó te cuíta nihnu-ndo, chi quíhíⁿ-ndó nūú ùhú núu ndàhú. Dico núu dañá-ndo mēe-ndo

chindee ñaha Espíritú Yă Ndiõxí xii-ndo cuendá sá vă cùnùu-gá sá cuèhé sá dúhá ìní-ndó ñá, te nduu táhú-ndó cùndecu-ndo ndihí-gá ni caa ni quíhíⁿ te núu ducaⁿ na càda-ndo.

14 Chi nchaa ñáyiú quide nchaa nacuaá sànu ichi ñaha Espíritú Yă Ndiõxí cúũ-yu déhe-gá. 15 Te Espíritú sá ní taxi Yă Ndiõxí ndécú ndihí-o ñá túú quide-xi sá nchóó yùhú-ó cùnu cuechi-o núú-gă, chi Espíritú-áⁿ quidé-xí să nchóó cùu-o déhe-gá, te diu-ni Espíritú-áⁿ quidé xăhaⁿ-o xii Yă Ndiõxí: “ÿyòhó Dútú Ndiõxí cúú-n Tătá mée-ndí!”, duha xăhaⁿ-o xii-gá. 16 Te diu-ni Espíritú-gá-ăⁿ tnàhá tnúhu-xi ndihí ìní-ó, te càháⁿ ndáá-xi sá nchóó cùu-o déhe-gá. 17 Te sá dúcáⁿ cùu-o déhe Yă Ndiõxí xíăⁿ ní cachí-gá sá tnàhá-ó ndùu táhú-ó să ní nduu táhú Xítohó Jesucristú, te ducaⁿ ndùu táhú-ó te núu na càda ndee ìní-ó ndòho-o datná ní ndoho Xítohó Jesucristú, te núu ducaⁿ te ío cuu càhnu-o ndihí-gá ni caa ni quíhíⁿ.

18 Te yúhú càchí-í sá ñà túú nă cada-xi cuèi ndòho-o cuendá-gá ndécú-ó ñùyíú-a, chi ío váha càa núú ndúú táhú-ó cùndecu-o na saá nduu. 19 Te nchaandi túhú sá ní cadúha Yă Ndiõxí ní taxi ndecu-gá ñuyíú-a ndètu cahnu-ná-xi sáá nduu càchí-gá sá ío càhnu cuu nchaa déhe-gá. 20 Te nchaa sá ní cadúha Yă Ndiõxí ní taxi ndecu-gá ñuyíú-a ní sáá nduu ñà túú-gă cúú-xí să văha sá cúú-xí-gă. Te ñá díú mèe sá ní taxi ndecu Yă Ndiõxí ñuyíú-a ducaⁿ ni sàni ìní-xi cunduu, chi mee-gă ducaⁿ tnàhí ní cachí-gá cunduu sá sàá nduu vă cúú-xí să văha sá cúú-xí-gă, dico sáá tucu nduu te nchaa xíăⁿ cuu tucu-xi sá văha sá cúú-xí-gă. 21 Te

nchaa sá nǐ taxi ndecu-gá ñuyíú-a vá cúndùu-gá-xi dàtná cáá-xí vitna te nǐ vǎ dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá. ²² Te nàha-o sá ncháándì túhú sá nchító nǐ cadúha Yá Ndiǒxí ndécú ñuyíú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi. ²³ Te ñá díú-ní nchàa sá dúcáⁿ nǐ cadúha-gá-ǎⁿ ducaⁿ ndòho-xi, chi tnahá nchoo dùcaⁿ ndoho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiǒxí Espíritú sá nǐ cachí méé-gǎ nduu táhú-ó díhnanuu. Te ío ndòho tnahá-ó ndecu-o ñuyíú-a te ndètu cahnu-ná-ó sǎá nduu ndàda saa-gá yiqui cùñú-ó, te cǎháⁿ-gá sá cúú-ó dèhe-gá. ²⁴ Te Yá Ndiǒxí ní quide-gá ní naníhí tàhú-ó nǔu xǎⁿ ní ngúndecu ndihí-o tnǔhu ndee ìní ndétú-ó sǎá nduu càda-gá nàcuáa ní cachí-gá, te núu sa ndècu ndihí-o sá ndúú tǎhú-ó te vá cúú cǎháⁿ-ó sǎ cúndètu-o sá ndúú tǎhú-ó chi sa ndècu ndihí-o. ²⁵ Dico sá ndétú-ó ndùu táhú-ó cùu-xi sá vǎtá cúndècu ndihí-gá-ó, te xìni ñuhu-ni-xi cada ndee-ni iní-ó cùndetu-o ndéé sǎá nduu ndùu táhú-ó sǎ dúcáⁿ nǐ cachí Yá Ndiǒxí nduu táhú-ó.

²⁶ Te Espíritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xìní-ó cǎháⁿ ndihí-o Yá Ndiǒxí nàcuáa tàú-xi cunduu dico Espíritú-gá cǎháⁿ ndàhú-xi núú-gǎ cuendá-ó cuèi òré ñá ñihí-ó tnǔhu cǎháⁿ-ó cuendá nchaa sá ìo cuìní-ó cǎcáⁿ-ó nǔú-gǎ. ²⁷ Te Yá Ndiǒxí sa nàha ndáá-gá nchaa nàcuáa sàni iní-ó, te ducaⁿ sà naha ndáá-gá nchaa nàcuáa sàni iní Espíritú-gá. Te Espíritú-gá cǎháⁿ ndàhú-xi núú-gǎ cuendá nchoo ñǎyiu yìndaha-gá, te cǎháⁿ ndàhú-xi núú-gǎ nàcuáa cuìní méé-gǎ cunduu.

Nchaa sá ná càda ñaha ñáyi te vá ndácũ-yu na-datùhú-yu iní-ó chi ndacu nahi-ni-o yãha-o nchàa sá ná càdá ñàhá-yu

²⁸ Te sa nàha-o sá Yã Ndiõxí quidé-gã sá ncháá sã yãha-o ndècu-o ñuyíú-a cùu-xí sá vãha sá cúu-xí nchòo cue ñáyi cùu iní ñáhá xii-gã, chi cùu-o ñáyi ní cáháⁿ-gã cundecu ndihí-gã dàtná ní cachí iní mée-gã. ²⁹ Te ndéé cútnàhá vátá ngãva-gã ñuyíú, te Yã Ndiõxí sa nàha-gã nándi cùu ñáyi cundecu ndihí-gã, te ñiu-ni ndéé dàvá-áⁿ ñí cachí-gã sá ñáyi-áⁿ cunduu váha iní-yu dàtná váha iní Déhe mee-gã, te ducaⁿ ñí cachí-gã cuendá sá Dèhe mee-gã-áⁿ cunuu-gã núu nchàa ñáyi cundecu ndihí-gã. ³⁰ Te nchaa ñáyi ducaⁿ ñí cachí-gã cundecu ndihí-gã ndéé cútnàhá vátá ngãva-gã ñuyíú càháⁿ ñáhá-gã xii-yu vitna, te nchaa ñáyi ducaⁿ càháⁿ-gã càchí-gã sá ñà túú-gã cuéchi-yu ndècu núu-gã, te ñiu-ni ñáyi-áⁿ cachí-gã sá ño càhnu cuú-yu.

³¹ Te vitna ní cutnùní iní-ó, te ñà túú nãgá cani iní-ó, chi Yã Ndiõxí ndécú ndihí ñaha-gã xii-o, te vá yõo ñⁿ-gã ndacu quehdé nihnu cuendá sá vã chíndèe ñaha-gã xii-o. ³² Te Yã Ndiõxí ñà túú ní cùdí iní-gã Déhe-gã sá cúu-gã cuendá nchaa nchoo ñáyi xíndecu ñuyíú-a, te sá dúcáⁿ ndéé Déhe-gã ñà túú ní cùdí iní-gã xíáⁿ cútnùní iní-ó sã táxí-gã nchaandi túhú sá xíní ñùhu-o. ³³ Te vá yõo ñⁿ ndacu cacáⁿ cuéchi núu Yã Ndiõxí cuendá nchaa ñáyi ní cachí-gã cundecu ndihí-gã te núu ná cúu cuéchi-yu ndècu. Chi mee-gã càchí-gã sá ñà túú ndècu cuéchi-yu núu-gã. ³⁴ Te vá yõo ñⁿ ndacu daquihíⁿ ñáhá xii-o núu ùhú núu ndàhú, chi Xítóhó

Jesucristú ní xíhí-gá te ní ndoto-gá, te cuándaa-gá núú ndécú Dútú Ndiöxí núcõo-gá xio cùha-gá, te ducaⁿ ïo cùnuu-gá, te yàcáⁿ càháⁿ ndàhú-gá núú Dútú Ndiöxí cuendá-ó. ³⁵ Te vá yõo ìⁿ ndacu cada ñaha xii-o ìⁿ sá ñà túú vǎha cuendá sá vǎ cúú ìní ñáhá-gǎ Xítóhó Jesucristú xii-o, te ni tnúndòho tnúhu ndàhú, te ni sá ndìhú iní-ó ñǎ cútnùní iní-ó nǎsa cada-o cǎcu nihnu-o ìⁿ sá ná yǎha-o, te ni nchàa sá cáda ñaha ñáyiu sá cuendá-gá, te cuèi-ni sá vǎ ñihí-ó sǎ cóhó sǎ cáxí-ó, te cuèi-ni sá vǎ ñihí-ó dǒó cuihnu-o, te cuèi ndècu-ná-ó sǎ yǎha-o ìⁿ sá yǎha-o, te cuèi sa ndècu-ná-ó sǎ cáhni ñáhá-yu, dico Xítóhó Jesucristú vá dáñá ndèé-gá sá cúú ìní ñáhá-gǎ xii-o. ³⁶ Te quee ndáá-xi nàcuáa ní cáháⁿ ìⁿ téé ní xóo cáháⁿ tnúhu Yá Ndiöxí ndéé sanaha ñí ngódó tnùní núú tütú-gá núú càchí-xi:

Yòhó Dútú Ndiöxí nchaa-ni nduu nchaa-ni òré cuìní ñáyiu cahni ñáhá-yu xii-ndí sá cuendá-n,

te càchí-yu sá cúú-ndí dàtná cue mbéé cue quití sa ndècu túha-ná cahni-yu.

Duha ní cachí téé ní xóo cáháⁿ tnúhu-gá-áⁿ, te ducaⁿ ñí ngódó tnùní núú tütú-gá. ³⁷ Te cuèi ducaⁿ nǎndi sá ná càda ñahá-yu xii-o, dico vá ndácũ-yu na-datùhú-yu iní-ó chi ndacu nahi-ni-o yǎha-o nchàa sá dúcáⁿ ná càda ñahá-yu xii-o, te ducaⁿ chi Xítóhó Jesucristú Yaá ïo cùu ìní ñáhá xii-o ndecu ndihí ñaha-gá chindèe ñaha-gá. ³⁸⁻³⁹ Te yúhú cútnùní ndáá iní-í sá ñí ìⁿ sá ìó ñuyúú-a vá ndácú-xí càda-xi cuendá sá vǎ cúú ìní ñáhá-gǎ Yǎ Ndiöxí xii-o, te ni sǎ cùú-ó, te ni sǎ cúndècu-o ñuyúú-a, te ni ìⁿ espíritú sá ïo cùnuu cundihí yucu ñávǎha te ni ìⁿ

dava-gá cue espíritú cundìhi-xi vá ndácú-xí càda-xi cuendá sá vǎ cúú ìní ñáhá Yǎ Ndiǒxí xii-o. Te ni sǎ cúú ñùyíú-a vitna, te ni sǎ cúú ndèè cuèé-gá, te ni ìⁿ sá ndécú àndiù, te ni ìⁿ sá ndécú ñùyíú-a, te ni ìⁿ sá ñí cadúha mee Yǎ Ndiǒxí, ni ìⁿ xǎⁿ vá ndácú-xí càda-xi cuendá sá vǎ cúú ìní ñáhá-gǎ xii-o chi ndècu ndìhi-o Xítóhó Jesucrístú Yaá cúú Xítóhó-ó.

9

Yá Ndiǒxí ní cachí-gá sá ñǎyiu isràél cuú-yu ñáyiu canchicúⁿ nihnu ñaha xii-gá

¹ Te yúhú càháⁿ ndáá-í chi cùu-í ìⁿ téé ndècu ndìhi Xítóhó Jesucrístú, te ndècu ndìhi-í Espíritú Yǎ Ndiǒxí ñǎu xǎⁿ cútnùní ìní-í sá càháⁿ ndáá-í. ² Te nchaa-ni nduu nchaa-ni òré ío ndìhú ìní-í, te ducaⁿ-ni ïo quide úhú-xi ìní-í ³ sá cuendá nchaa ñáyiu cùu ndì mee-í. Te núu dìcò cúú-xí ìⁿ sá chíndèè ñaha xií-yu nucúndecu váha-yu núú Yǎ Ndiǒxí ñá, te dàña-í mée-í dàcuíta nihnu ñaha Xítóhó Jesucrístú ñǎu dìcò sá cúú. ⁴ Te nchaa ñáyiu cùu ndì mee-í-áⁿ cúú-yu ñáyiu isràél, te Yá Ndiǒxí ní cachí-gá sá cúú-yu déhe-gá, te ní quide-gá nàcuáa ní cutnùní ìní-yu sá ïo càhnu cuu-gá, te ní càháⁿ ndáá-gá núú-yu nàcuáa cada ñaha-gǎ xií-yu, te ní xáhaⁿ-gǎ xii ndíi Moisés ní chídó tnùní ndíi nàcuáa cadá-yu cundecú-yu. Te ní xáhaⁿ-gǎ xií-yu nàcuáa cadá-yu cada càhnu ñahá-yu xii-gá, te ní xáhaⁿ tùcu-gá xií-yu nchaa nàcuáa cada-gá ndéé cuèé-gá. ⁵ Te nchaa ñáyiu-áⁿ cúú-yu ñaní tnáhá nchàa cue téé ní cunuu ñí xíndecu ndéé sanaha, te ñǎu-ni ñaní tnáhǎ-yu cùu Xítóhó Jesucrístú Yaá ní tendaha Dǔtú Ndiǒxí ní quixi ñuyíú-a, te tnáhá-gá

cúú-gă Ndiöxí te ío cùnuu-gá, te nchaa nduu nchaa quíú ío càhnu cuu-gá. Te ducaⁿ na cùnduu.

⁶ Te vá cächí-ó sǎ Yǎ Ndiöxí ñá túú ní quide-gá nchaa nàcuáa ní cachí-gá cada-gá cuendá sá ñà túú sàndáá iní ñáhá dǎva ñáyiú isràél xii-gá. Te sá dúcáⁿ xǐquide davá-yu te ñá túú quidé-yu nàcuáa tàú-xi cadá-yu sá cúú-yu ñáyiú isràél. Te ñáyiú ducaⁿ xǐquide-áⁿ cúú-yu ñáyiú ñá túú cùu cuendá ñáhá Yǎ Ndiöxí. ⁷ Te cuèi ncháá-yu cùú-yu ñaní tnáhá ndíi Àbrahám dico ñá túú quidé-yu nchaa nàcuáa tàú-xi cunduu cadá-yu sá cúú-yu ñaní tnáhá ndíi. Te Yá Ndiöxí ní xáhaⁿ-gǎ xii ndíi Àbrahám: “Nchaa cue ñaní tnáhá tǎ Isàác tée cùu déhe ducuⁿ-n, mee-ni cuè ñáyiú-áⁿ cuu ñaní tnáhá-n”, duha ní xáhaⁿ-gǎ xii ndíi Àbrahám. ⁸ Te xǎⁿ cútnùní iní-ó sǎ ñǎ ncháá ñáyiú cùu ñaní tnáhá ndíi Àbrahám cúú-yu ñáyiú cùu cuendá Yǎ Ndiöxí, chi mee-ni ñáyiú sàndáá iní nàcuáa ní cáháⁿ-gá cada-gá, ñáyiú-áⁿ cúú cuendá-gá. ⁹ Te duha ndùu tnúhu ní xáhaⁿ Yǎ Ndiöxí xii ndíi Àbrahám: “Sáá nduu te yúhú cada-í te coo ìⁿ déhe-n ndìhi ñadihí-n tǎ Sǎrá”, duha ní xáhaⁿ-gǎ xii ndíi.

¹⁰ Te ñá díú-ní xǎⁿ ní quide Yá Ndiöxí, chi tnáhá ní ndatnúhu-gá ndìhi ndíi Rèbecá cútnáhá vitna ñùhu úú déhe ndíi ndìhi ndíi Isàác tée ní cuu ñaní tnáhá-ó ñí xíndecu ndéé sanaha. ¹¹⁻¹³ Te cútnáhá vitna ñùhu-gá déhe ndíi Rèbecá, cútnáhá vátá cadá-gǎ-güexi ni ìⁿ sá cuèhé sá dúhá, te ni ìⁿ sá vǎha, ní xáhaⁿ Yǎ Ndiöxí xii ndíi: “Déhe-n tǎe díhna na càcu te tée-áⁿ tnì-dé nchaa tnúhu cáháⁿ déhe-n tǎe cùu uú ná càcu”, duha ní xáhaⁿ-gǎ xii ndíi Rèbecá. Te ní quee ndáá-xi nàcuáa ní cáháⁿ Yǎ

Ndiöxí núú tütú-gá núú càchí-xi: “Té Jàcób ní cuu váha iní-í núú-dě, te té Esàù ñá túú ní cùu váha iní-í núú-dě”, duha càchí-gá núú tütú-gá. Te ducaⁿ ñí cuu chi ducaⁿ ñí cachí méé-gă cunduu sá cãháⁿ-gá nchaa ñáyíu cuìní méé-gă, te ñá díú cuèndá ìⁿ chiuⁿ quidé-yu cãháⁿ ñáhá-gă xii-yu.

14 ꞑTe vá cúú tnàhí cãháⁿ-ó sã Yă Ndiöxí ñá túú quide váha-gá sá dúcáⁿ quide-gá chi mee-gă ío ndáá quidé-gă! 15 Te mee-gă ní xáhaⁿ-gă xii ndíi Moisés: “Cundàhú iní-í chindee-í mee-ni cuè ñáyíu càchí iní-í”, duha ní xáhaⁿ-gă xii ndíi. 16 Te xíáⁿ cútnùní iní-ó sã cundàhú iní-gá ñáyíu chi ducaⁿ cuìní méé-gă cunduu, dico ñá túú cundahú iní ñáhá-gă xii-yu cuèndá sá dúcáⁿ cuìní-yu cada-gá, te ni ñà túú cundahú iní ñáhá-gă xii-yu cuèndá sá ío ndùcu ndeé-yu quidé-yu ìⁿ sá quidě-yu. 17 Te núú tütú Yă Ndiöxí cãháⁿ-xi nàcuáa ní xáhaⁿ-gă xii téé ní cuu Faràón téé ní xíndaha nàcióⁿ Ègiptú, te duha ní xáhaⁿ-gă: “Yúhú ní quide-í yíndàha-n ñáyíu cuèndá cada-í tìtní núú sã cãdà-í núú-n cuèndá cutnùní iní-n sã ío cãhnu cuu-í, te ducaⁿ nchaa ñáyíu ñuyíú cutnùní iní-yu sá yúhú cúú-í Ndiöxí”, duha ní xáhaⁿ-gă xii téé ní cuu Faràón. 18 Te xíáⁿ cútnùní iní-ó sã Yă Ndiöxí cundàhú iní-gá mee-ni cuè ñáyíu càchí iní méé-gă, te ducaⁿ ndàda díi-gá iní nchaa ñáyíu càchí iní méé-gă ducaⁿ cãda-gá.

19 Te sá dúhá cãháⁿ-í te dava-ndo quèsaha-ndo: “Ná cuèndá Yă Ndiöxí dácàa-gá cuéchi díquí ñáyíu núú ni ìⁿ-yu ñá ndácũ-yu quehdé nihnú-yu cuèndá sá vã cãdá Yă Ndiöxí nàcuáa cuìní-gá”, que-saha-ndo. 20 Te chí cuăha cuèndá sá dicó ñáyíu ñuyíú-a cùu-ndo te ñá túú ndùu váha-xi sá nchòhó

cáháⁿ-ndó ìⁿ tnúhu sá ñà túú ndùu váha sá cúú-xí Yá Ndiöxí. Te duha na cáháⁿ-í núú-ndó nàcuáa tecú tnùní-gá-ndó nàcuáa ndùu tnúhu cáháⁿ-í. Te ñá túú xìní-ó sǎ ìⁿ quídi ñuhu cúñaha-xi xii ñáyiú ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi. ²¹ Chi ñáyiú cadúha nchaa quídi-áⁿ cuu-ni cadúha-yu ndihi ñuhu cuéi nása na cùnduu quídi cadúha-yu canehe chiúⁿ-yu, chi ìⁿ-ni ñùhu cadúha-yu quídi cánehe chiúⁿ-yu ndi tnahá nduu sàcáo-yu vico ndihi quídi sá cǎnehe chiúⁿ-yu nduu cùtexínu.

²² Te ñiⁿ-ni ducaⁿ quide Yá Ndiöxí, chi cuení-gá dandòho-gá ñáyiú ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sá ïo cǎhnu cuu-gá. Te sa ndècu túha-ná-yu sá quihíⁿ-yu núú ùhú núú ndàhú, te cuéi ducaⁿ dico ío ta quide cǎhnu iní-gá cuáháⁿ. ²³ Te ducaⁿ quide-gá cuendá cutnùní iní nchaa ñáyiú ñuyíú sǎ ïo váha quide-gá sá cúú-xí nchàa nchoo ñáyiú cùndahú iní-gá, chi ní cachí-gá sá nchóó cuè ñáyiú cùndahú iní-gá nduu táhú-ó cùndecu-o ndihi-gá núú ïo váha cǎa ndecu-gá. ²⁴ Te dava nchoo ñáyiú ní cáháⁿ Yá Ndiöxí cúú-ó ñáyiú isràél, te dava-o cùu-o ñáyiú ñá túú cùu ñáyiú isràél. ²⁵ Te ní quee ndáá-xi nàcuáa ní xáhaⁿ Yá Ndiöxí xii ndí Òseás téé ní xóo cáháⁿ tnúhu-gá ndéé sanaha ní chídó tnùní ndíi núú tütú-gá núú cǎchí-xi:

Ñáyiú ñá túú cùu cuendá-í ní cùu te nduu cuendá-í-yu,

te ñiⁿ-ni ñáyiú-áⁿ ñà túú cùu váha iní-í núú-yu ni cùu, dico vitna cùu váha iní-í núú-yu.

26 Te d̄iu-ni ñuú núú dúcáⁿ ñĩ cachí-í sá ñã túú ñãyiu cùu cuendá-í d̄iu-ni ñuú-áⁿ coo ñãyiu cuu déhe yúhú Dútú Ndiõxí Yaá ndécú tũu and̄iu.

Duha ní xáhaⁿ Yã Ndiõxí xii ndíi Òseás ní chídó tnùní ndíi núú tütú-gá. 27 Te ndíi Chàíá téé ní xóo cáháⁿ tucu tnúhu Yá Ndiõxí ndéé sanaha ñĩ cáháⁿ ndíi cuendá ñãyiu isràél, te duha ní cachí ndíi: “Cuèi cuéhé víhí ñãyiu isràél dàtná cuéhé ñuhu cúchí lámár dico sacú-ni-yu vá quíní-yu tnúndòho tnúhu ndàhú. 28 Te Yá Ndiõxí ío ndíhi cada-gá nchaa nàcuáa càháⁿ-gá ñuyúú”, duha ní cachí ndíi. 29 Te ní cáháⁿ tucu ndíi nàcuáa cada-xi ndéé cuéé-gá, te ní cachí ndíi:

Yá Ndiõxí Yaá táxí tnùní nchaandi túhú sá ío and̄iu ndíhi ñuyúú ñã túú ní dànaa-gá nchaa ñãyiu isràél, chi núu ni ndíhí-yu danàa ñaha-gá, te nchoo cùu-o datná ní cuu nchaa ñãyiu ní xíndecu ñuú Sòdomá ndíhi nchaa ñãyiu ní xíndecu ñuú Gòmorrá, te ndíhi-o nàa datná ní naa nchaa ñãyiu-áⁿ ní cùu.

Duha ní cachí ndíi.

Ñãyiu isràél ñã túú sàndáá iní-yu tnúhu Xítóhó Jesucrìstú

30 Te sá cuendá xíáⁿ nũu vitna càchí tnúhu-í xii-ndo sã cuè ñãyiu ñã túú cùu ñãyiu isràél ñã túú ní nànducu nihnú-yu nàcuáa cadá-yu cudíú-yu núú Yã Ndiõxí, dico vitna cùdú-yu núú-gã chi ní sàndáá iní-yu Xítóhó Jesucrìstú. 31 Te ñãyiu isràél nchícúⁿ nihnú-yu tnúhu sá dánèhé ñáhá xíi-yu nàcuáa cadá-yu cudíú-yu núú Yã Ndiõxí dico ñã túú cùdú-yu núú-gã chi ñã ndácũ-yu cadá-yu nchaa nàcuáa càháⁿ-xi. 32 Te ducaⁿ ñã túú cùdú-yu

núú Yă Ndiöxí chi ñá túú sàndáá iní-yu Xítóhó Jesucrístú, te sàni iní-yu sá sã cuendá mee-ni nchàa sá quidé mèé-yu cudìú-yu núú-gă, te sá dúcáⁿ quidé-yu te cùú-yu dàtná ìⁿ ñáyiu nguñenu ìⁿ yúú te nduá-yu. Te ducaⁿ sãtnahá-xi cùú-yu chi ñá túú cùu váha iní-yu núú Xítóhó Jesucrístú. ³³ Te quèe ndáá-xi nàcuáa ní cáháⁿ Yă Ndiöxí ìⁿ xichi núú tütú-gá núú càchí-xi:

Yúhú táxi ndècu-í ìⁿ téé ñuú Sìón, te cuu-dé dàtná ìⁿ yúú, te yúú-ãⁿ nguñenu ñáyiu te nduá-yu, te nchaa ñáyiu na quíndáá iní ñáhá xii-dé, te vá ndíxí cuèchi iní-yu sá dúcáⁿ ñí sándáá iní ñáhã-yu xii-dé.
Duha càchí-gá núú tütú-gá.

10

¹ Te nchòhó ñáyiu ndècu ndihi-í ichi Xítóhó Jesucrístú càchí tnúhu-í xii-ndo sã cáháⁿ ndihi-í Yă Ndiöxí cuendá ñáyiu israél, chi ío cuíní-í sá nánihí tãhú-yu. ² Te na cáháⁿ ndáá-í cuendá-yu sá ïo ndùcu ndeé-yu xìnu cuechí-yu núú Yă Ndiöxí, te dícó-ni sá ñá túú quidé-yu nàcuáa cuíní méé-gă cadá-yu. ³ Chi ñá túú quide cuendá-yu nàcuáa cuíní Yă Ndiöxí cada ñaha-gă xií-yu nàcuáa cudìú-yu núú-gă, te quide-ní-yu nàcuáa sàni iní méé-yu cudìú-yu núú-gă te ñá túú cuíní-yu tnií-yu tnúhu càháⁿ-gá nàcuáa cudìú-yu núú-gă. ⁴ Te Xítóhó Jesucrístú ní quide-gá cuendá sá vã cúnù-gá nchaa tnúhu ní chídó tnùní ndí Moisés, te nchaa ñáyiu na quíndáá iní ñáhá xii-gá te ñiu-gá cada te cudìú-yu núú Yă Ndiöxí.

5 Te ndíi Moisés càháⁿ ndíi núú tütú ndíi cuendá ñáyiú cuíní cudíu núú Yă Ndiöxí cuendá sá nchícúⁿ nihnú-yu nchaa năcuáa ní cáháⁿ ndíi. Te ní cachí ndíi sá ncháá ñáyiú na càda nchaa nacuáa ní xáhaⁿ Yă Ndiöxí xii ndíi ní chídó tnùní ndíi te naníhí tàhú-yu, te núu dicó ndacú-yu cadá-yu nchaa năcuáa ní cáháⁿ ndíi. 6 Dico vitna núu na quindáá iní-ó Xítohó Jesucrístú, te cudíu-o núú Yă Ndiöxí. Te duha càchí tnúhu ní chídó tnùní ndíi núú tütú-gá: “Vá cání iní-ndó să xíní ñúhu-xi cada-ndo ìⁿ sá vă yõ tnàhí ndàcu cada sá cáá tũu-ndo àndíu te cúñaha-ndo xii Cristú cuuⁿ-ndo ndíhi-gá núú ñùyíú-a. 7 Te ni vă cání tucu iní-ndó să quíhíⁿ túu-ndo núú xĩndecu nchaa ñáyiú ní xíhí te cada-ndo să Crístú ndoto-gá”, duha càchí tnúhu-áⁿ să vă dúcáⁿ càni iní-ó. 8 Te càchí tucu tnúhu-áⁿ: “Tnúhu Yă Ndiöxí sá ndécú ndíhi ñaha-xi xii-ndo chi sàni iní-ndó cuendá tnúhu-áⁿ te càháⁿ-ndó”, duha càchí tnúhu-áⁿ. Te tnúhu sá ndécú ndíhi-ndo-áⁿ cúú-xí tnúhu càháⁿ-ndí núú ñáyiú, te xini ñuhu-xi sá quindáá iní-yu tnúhu-áⁿ. 9 Te núu na nũnuu-ndo cãháⁿ-ndó să Xítohó Jesucrístú cúú-gă Xítohó-ndó, te quindáá iní-ndó nì yuhu ni iní-ndó să Yă Ndiöxí ní dándótó-gă Xítohó Jesucrístú, te naníhí tàhú-ndó te núu ducaⁿ na càda-ndo. 10 Te nchaa ñáyiú ducaⁿ sàndáá iní te cáháⁿ-yu sá Xítohó Jesucrístú cúú-gă Xítohó-yu, ñáyiú-áⁿ cúdíú-yu núú Yă Ndiöxí te naníhí tàhú-yu. 11 Te núú tütú Yă Ndiöxí càchí-xi sá nì ìⁿ ñáyiú sàndáá iní ñáhá xii Xítohó Jesucrístú vá ndíxí cuèchi iní-yu sá dúcáⁿ sàndáá iní ñáhă-yu xii-gá. 12 Te sá cúú-xí Xítohó Jesucrístú chi ìⁿ-ni cùu ñáyiú isràél ndíhi ñáyiú ñá túú cùu ñáyiú isràél, chi diu-gá

cúú-gă Yaá cúnùu taxi tnuní-gá nchaa ñáyiú, te ío váha quide-gá sá cúú-xí nchaa ñáyiú càháⁿ ndíhi ñaha xìi-gá. ¹³ Te quèe ndáá-xi nàcuáa càháⁿ-xi núú tütú Yă Ndiöxí núú càchí-xi: “Nchaa ñáyiú na càháⁿ ndáhú núú Xítohó Jesucrístú sá dácăcu nihnu ñaha-gă xii-yu, te ñáyiú-áⁿ naníhí tǎhú-yu”, duha càchí-xi núú tütú-gá. ¹⁴ Te ñáyiú-áⁿ vǎ nihí-yu nàcuáa cáháⁿ ndáhú-yu núú-gă te núu ñá túú sàndáá iní ñáhǎ-yu xii-gá, te ni vǎ nihí-yu nàcuáa cadá-yu quindáá iní ñáhǎ-yu xii-gá te núu vátá cundédóho-gá-yu tnúhu-gá, te ni vǎ nihí-yu tnúhu-gá te núu vá yǒo quíhíⁿ cútnuhu ñaha xìi-yu. ¹⁵ Te ni vǎ yǒo quíhíⁿ ducaⁿ cǔtnuhu ñaha xìi-yu tnúhu-gá te núu Yá Ndiöxí vá téndàha-gá ñáyiú quíhíⁿ cútnuhu ñaha xìi-yu. Te núú tütú Yă Ndiöxí càchí-xi: “Ío vii ío váha cùu iní-ó vǎxi ñáyiú dànèhé ñáhá xìi-o nàcuáa ndùu tnúhu sá càháⁿ nàcuáa naníhí tǎhú-ó”, duha càháⁿ-xi núú tütú-gá.

¹⁶ Te ñá ncháǎ-yu cuení-yu quindáá iní-yu tnúhu-áⁿ. Te ní quee ndáá-xi nàcuáa ní xáhaⁿ ndíi Chàíá xii Yá Ndiöxí te duha ní xáhaⁿ ndíi xii-gá: “Yòhó Dútú Ndiöxí na nàcani tnúhu-í núú-n sǎ ío sacú-ni ñáyiú sàndáá iní-yu tnúhu càháⁿ-ndí”, duha ní xáhaⁿ ndíi xii-gá. ¹⁷ Te xìni ñuhu-xi sá dǐhna-gá cundedóho-yu tnúhu-áⁿ cuendá ducaⁿ te quindáá iní-yu, te tnúhu-áⁿ cúú-xí tnúhu Xítohó Jesucrístú.

¹⁸ Te vá cúú càháⁿ-ó sǎ ñà túú ní ñíhí ñáyiú isràél tnúhu-gá, chi ncháá-yu ní ñíhí-yu tnúhu-gá, chi núú tütú Yă Ndiöxí càchí-xi: Cue tée ní càháⁿ tnúhu Yá Ndiöxí ní càháⁿ-güedé tnúhu-gá núú ñáyiú, te tnúhu-áⁿ ñí xité nuu-xi ñíhí ñuyú.

Duha càchí-xi núú tùtú-gá. ¹⁹ Te ni vǎ càháⁿ-ó sǎ ñáiyu isràél ñá túú ní cùu tnùnì iní-yu nàcuáa ndùu tnúhu-gá chi ní tecú tnùnì-yu. Te ndéé sanaha ñí chídó tnùnì ndí Moisés nàcuáa ní xáhaⁿ Yǎ Ndiǒxí xii ñáiyu isràél, te duha ní xáhaⁿ-gǎ xii-yu:

Yúhú cada váha-í nchaa ñáiyu ñá túú cùu ñáiyu isràél, ñáiyu ñá túú cùtnunì iní-xi nàcuáa cada váha cundecu núù-í, te nchòhó cudééⁿ-ndó nǔǔ-yu te cuu cuédú iní-ndǒ-yu.

Duha ní xáhaⁿ Yǎ Ndiǒxí xii-yu te ducaⁿ ñí chídó tnùnì ndí Moisés. ²⁰ Te ndí Chàíá ñá túú tnàhí ni yùhú ndí ní quide ndí núú Yǎ Ndiǒxí ní cáháⁿ ndí tnúhu-gá, te ní cachí ndí:

Ñáiyu ñá túú nànducu ñaha xii-í ní cùu ní naníhí ñáhǎ-yu xii-í, te ni ñà túú ndùcu tnúhu ñàhá-yu xii-í ní cùu te ní xiní ñáhǎ-yu.

Duha ní cachí ndí Chàíá ní cáháⁿ ndí tnúhu Yǎ Ndiǒxí. ²¹ Te ní quide tucu ndí núú Yǎ Ndiǒxí ní cáháⁿ ndí tnúhu-gá cuèndá ñáiyu isràél, te ní cachí ndí: “Nchaa-ni nduu yíhi-í càháⁿ-í ñáiyu isràél te ñá túú cuìní-yu quíndáá iní-yu chi ío sàá iní-yu”, duha ní cachí ndí Chàíá ní cáháⁿ ndí tnúhu Yǎ Ndiǒxí.

11

Cuèndá ñáiyu isràél ñáiyu naníhí tàhú

¹ Te cuèi ducaⁿ dico vá càháⁿ-ó sǎ Yǎ Ndiǒxí dáquèe tíhú-gǎ ñáiyu isràél chi ñíu-ni ñáiyu-áⁿ cúu cuèndá-gá, chi yùhú tnàhá-í cúu-í mei tǎe isràél, te ñaní tnàhá-í ní cuu ndí Àbrahám tée ní xíndecu ndéé sanaha vìhi-gá, te ñíu-ni ñaní tnàhá-í ní cuu tucu

ndíi Benjàmín. ² Te ndée sanaha dùcaⁿ ní cachí Yă Ndiöxí sá nchũhú ñáyiú isràél cúú-ndí ñáyiú cùu cuendá-gá, te ñá túú dàquee tíhú ñáhá-gă xii-ndí, te nchòhó sa xìní-ndó nàcuáa càháⁿ-xi núú tütú Yă Ndiöxí núú càchí-xi nàcuáa ní quide té Èliás ní ndacáⁿ cuéchi-dé núú-gă cuendá ñáyiú isràél. ³ Te duha ní xáhaⁿ-dě xii-gá: “Yòhó Dútú Ndiöxí, ná nàcani tnúhu-í núú-n sã ñí sahní-yu cue téé càháⁿ tnúhu-n, te ní dátànú-yu núú xihí quiti ndùu táhú-n, te yúhú-nă ní cácu-í ndécù-í dico nànducu ñahá-yu chi tnàhá-í cuini-yu cahni ñahá-yu xii-í”, duha ní xáhaⁿ-dě xii Yá Ndiöxí. ⁴ Te Yá Ndiöxí ní xáhaⁿ-gă xii-dé: “Sa ní dáquéé ðiⁿ-í úsá mĩ cue téé cùu cuendá-í, te ñá túú nèhe-güedé sá yĩñùhu núú Bàál sá càchí-yu cùu ndiöxí-yu te ñá ndàá sá ndiöxí cúú-xí”, duha ní xáhaⁿ-gă xii té Èliás. ⁵ Te ducaⁿ sãtnahá-xi cùu vitna chi xĩndecu ñáyiú ní cáháⁿ-gá ní chìtnahá ñáhá xii-gá, te ducaⁿ ñí quide-gá chi ní cundàhú iní ñáhá-gă xií-yu. ⁶ Te ducaⁿ ñí cáháⁿ ñáhá-gă xií-yu sá cundàhú iní ñáhá-gă, te ñá díú cuendá ðiⁿ chiuⁿ quidé-yu ducaⁿ ñí cáháⁿ ñáhá-gă xií-yu, chi núú ðicó cuendá ðiⁿ chiuⁿ quidé-yu ducaⁿ ñí cáháⁿ ñáhá-gă xií-yu ña, te ñá díú-gă sá cúú ñí mée-gă ducaⁿ ñí cáháⁿ ñáhá-gă xií-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuini-yu cudíú-yu núú Yă Ndiöxí dico ñá ndácũ-yu, dico dava ñáyiú ní cáháⁿ-gá ñáyiú-áⁿ cúdíú-yu núú-gă, te ñáyiú ducaⁿ ña túú cudíu núú-gă-áⁿ ïo ní cuu sàá iní-yu núú-gă. ⁸ Te ní quee ndàá-xi nàcuáa càháⁿ-xi núú tütú Yă Ndiöxí núú càchí-xi: “Yá Ndiöxí ní cachí-gá sá cúú-yu

ñáyiú ío ñi ðíquí-xi, chí cuèi ndèhé-yu nàcuáa càháⁿ tnúhu-gá dico ñá cútnùní iní-yu nàcuáa càháⁿ-xi, te cuèi ndèdóho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tütú-gá. ⁹ Te ndí Dàví ní cachí ndí:

Ñáyiú ío váha ndècu te cùdí iní-yu quidé-yu vico, dico yáha-yu dàtná yáha ñⁿ quiti ngáva trampá àdi ñⁿ quiti ñá cútnùní iní-xi quèe xití ñunu, chí cuíta nihnú-yu te nacháhu-yu nchaa sá quidě-yu.

¹⁰ Te cùu-yu ñáyiú ñá túú vèdana tècú tnùní, te cùu tucú-yu dàtná ñⁿ ñáyiú ío ndòho nchido ñⁿ sá vèe.

Duha ní cachí ndí Dàví.

Ñáyiú ñá túú cùu ñáyiú isràél naníhí tàhú-yu

¹¹ Te cuèi ducaⁿ dico vá càchí-ó sá sá dúcáⁿ ñà túú ní quide ndáá ñáyiú isràél te ní xíta nihnu duúⁿ-yu, te ñáhá chí sá dúcáⁿ ñi quidé-yu te ní ngúndecu ndíhi dava-gá ñáyiú tnúhu sá càháⁿ nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudí iní-yu naníhí tàhú-yu. ¹² Te sá dúcáⁿ ñi quide sáá iní-yu ñá túú ní quide ndáá-yu núú Yá Ndiõxí, te xíãⁿ ní cuu-xi ñⁿ sá váha sá cúú-xí ñáyiú ñihí ñuyíú, dico sáá nduu te cada ñáyiú isràél nchaa nàcuáa càháⁿ Yá Ndiõxí, te dàvá-áⁿ ío-gá váha cuu xii nchaa ñáyiú ñihí ñuyíú.

¹³ Te nchòhó ñáyiú ñá túú cùu ñáyiú isràél càchí tnúhu-í xii-ndo sá Yá Ndiõxí ní cachí-gá sá càháⁿ-í tnúhu-gá núú-ndó, te yúhú càchí-í sá ío càhnu cuu chiuⁿ quide-í. ¹⁴ Te duha càháⁿ-í cuendá sá ñuu cudana ío dava ñáyiú cùu ndi mee-í cudí iní-yu

cada váha ñaha Yă Ndiöxí xií-yu dàtná quidé vâha ñaha-gă xii-ndo, te naníhí tàhú-yu. ¹⁵ Te sá cuendá sá ñí quee tíhú ñăyiu isrâél ní nacáháⁿ cáhnú ínî tnáhá ñăyiu ñihî ñuyíú ndihî Yá Ndiöxí, dico na sâá nduu núcúndecu váha ñăyiu isrâél ndihî Yá Ndiöxí, te ío-gá váha tnahá ñăyiu ñihî ñuyíú, te ñăyiu-áⁿ cada iní-ó sâ cúŭ-yu dàtná ñăyiu ní xíhí, dico dâvâ-áⁿ cada tucu iní-ó sâ cúŭ-yu dàtná ñăyiu ní ndoto chi nucúndecu váha-yu ndihî-gá. ¹⁶ Te núu sá lúhá-ní ñⁿ tílúlú yusaⁿ cävâha te ðiu-ni ducaⁿ cävâha ñihî. Te núu cävâha yóho ñⁿ yutnu te ðiu-ni ducaⁿ cävâha-xi ñihî-xi. Te ðiu-ni ducaⁿ sâtnahá-xi cùu ñăyiu isrâél, chi ñanî tnáhă-yu ní xíndecu ndéé sanaha ñí cuú-yu ñăyiu ní cuu cuendá ñáhá Yă Ndiöxí, te ðiu-ni ducaⁿ cùu cuendá ñáhá-gă xii mèe-yu ndéé vitna.

¹⁷ Te ío ñⁿ yutnu váha nàni olívú, te dava dité yutnu-áⁿ ñí téhndé te ní nucódó dité yutnu òlívú cùtexínu, te mee-ñă yutnu òlívú váha-áⁿ ño váha quíde-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cúú-xí dàtná ñăyiu isrâél, te nchaa dité-xi sá ñí téhndé-áⁿ cúú-xí ðiu-ni ñăyiu isrâél ñăyiu ñá túú tnáhá tnúhu ndihî Yá Ndiöxí. Te dité yutnu òlívú cùtexínu sá ñí nucódó tnáhá-ăⁿ cúú-xí dàtná ñăyiu ñá túú cùu ñăyiu isrâél tnáhá tnúhu ndihî Yá Ndiöxí. ¹⁸ Te vá cánî ínî-ndó sâ sâ dúcáⁿ ndècu váha-ndo ndihî Yá Ndiöxí te ío cùnūu-ndo dacúúxí ñăyiu isrâél, te vá dúcáⁿ cânî ínî-ndó chi sá cuendá nchaa ñanî tnáhá ñăyiu isrâél ní xíndecu ndéé sanaha ducaⁿ ndècu váha-ndo ndihî Yá Ndiöxí vitna, te ñá díú sâ cuendá nchòhó ndécú ndihî váha ñăyiu-áⁿ Yă Ndiöxí vitna.

19 Te cudana sàni iní-ndó te càchí-ndó sǎ ñǎyiu isràél ní quee tǐhǔ-yu cuendá sá nchòhó nucuíñí-ndó nǔǔ-yu nucuñdecu váha-ndo ndìhi Yá Ndiǒxí. 20 Te ndáá sá ñǎ quee tǐhǔ-yu chi ñǎ túú ní sàndáá iní ñáhǎ-yu xii-gá, te nchòhó ío váha cùu ndecu-ndo ndìhi-gá chi ní sàndáá iní-ndó-gǎ, dico vá càchí-ndó sǎ ìo càhnu cuu-ndo, te ío váha chí cuǎha cuendá nàcuáa cundecu-ndo. 21 Te cue ñǎyiu isràél cúǔ-yu ñáyiu cùu cuendá-gá ní cùu te ní dáquée tǐhú ñáhá-gǎ xii-yu cuendá sá ñǎ túú ní sàndáá iní ñáhǎ-yu xii-gá, te tnàhá nchòhó daquée tǐhú ñáhá-gǎ xii-ndo te núu na càda-ndo datná ní quide ñáyiu-án. 22 Te chí cáda cuendá sá Yá Ndiǒxí ío váha iní-gá, dico cùdéeⁿ-gǎ núu nchàa ñáyiu ñǎ túú sàndáá iní ñáhá xii-gá, dico sá cúú-xí nchòhó cue ñáyiu sàndáá iní ñáhá xii-gá chi ío váha iní-gá. Te ducaⁿ-ni cùnduu váha iní-gá sá cúú-xí-ndó te núu vá dáñǎ ndèe-ndó càda-ndo nacuáa càháⁿ-gá cuendá sá ìo váha iní-gá, te núu ñáhá te tnàhá nchòhó quee tǐhú-ndó dàtná ní quee tǐhú ñáyiu isràél, ñáyiu ñǎ túú ní sàndáá iní ñáhá xii-gá. 23 Dico núu ñáyiu isràél ñáyiu ní dáquée tǐhú ñáhá Yá Ndiǒxí quíndáá iní ñáhǎ-yu xii-gá te nduu cuendá ñáhá tucu-gá xii-yu, te ñáyiu-án cúǔ-yu dàtná dava dité yutnu òlívú sá ñǎ téhndé te ní nucuódo tnàhá tucu. Te ducaⁿ sǎtnahá-xi cùú-yu te núu na quíndáá iní ñáhǎ-yu xii-gá. 24 Te nchòhó cúú-ndó dàtná nchaa dité yutnu òlívú cùtexínu, chi ñǎ díú ñáyiu isràél cúú-ndó, te dité nchaa yutnu òlívú cùtexínu-án ñǎ nucuódo-xi núu dité yutnu òlívú váha-án. Te yáchí-gá nucuñdecu váha ñáyiu isràél ndìhi Yá Ndiǒxí, chi cùú-yu dàtná nchaa dité yutnu

òlívú váha sá nǐ téhndé te ní nucódó tnáhá tùcu. Te ducaⁿ sǎtnahá-xi cùú-yu te núu na quìndáá iní ñáhǎ-yu xii-gá.

Sáa nduu te naníhí tàhú ñáyiu isràél

²⁵ Te nchòhó ñáyiu ndècu ndìhí-í ichi Xítóhó Je-sucrístú, na càchí tnúhu-í xii-ndo ìⁿ tnúhu ndùu yuhu ni cuu, cuèndá sá vǎ cání iní-ndó sǎ ìo-gá váha sáa díquí-ndó dàcúúxí ñáyiu isràél, chi dava ñáyiu isràél cúú sáa iní-yu núú Yǎ Ndiòxí nini na ndìhí ñáyiu ní cachí Yǎ Ndiòxí ngündecu váha ndìhí ñáhǎ-yu xii-gá, ñáyiu ñá túú cùu ñáyiu isràél. ²⁶ Te nduu na ndìhí ñáyiu-áⁿ ngündecu váha-yu ndìhí Yá Ndiòxí, te dàvá-áⁿ naníhí tàhú ñáyiu isràél chi quee ndáá-xi nàcuáa càháⁿ Yǎ Ndiòxí núú tùtú-gá núú càchí-xi:

Ndàa ñuú Sión quixi Yaá cada naníhí tàhú nchaa ñáyiu,
te diu-ni Yaá-áⁿ cada-gá cuèndá sá dáñá nchaa ñáyiu isràél ichi cuèhé ichi duha.

²⁷ Te yúhú cada càhnu iní-í nchaa cuéchi ñáyiu isràél, chi cada-í dàtná ní cachí-í ndéé sanaha. Duha càchí Yǎ Ndiòxí núú tùtú-gá.

²⁸ Te sá cuèndá tnúhu sá càháⁿ nàcuáa naníhí tàhú-ó xǎⁿ cúú ùhú iní ñáyiu isràél Yǎ Ndiòxí, te sá dúcáⁿ quidé-yu xǎⁿ nchòhó ní níhí-ndó tnúhu sá càháⁿ nàcuáa naníhí tàhú-ndó. Te ní cachí Yǎ Ndiòxí sá ñáyiu isràél cuu cuèndá-gá, te cùu iní ñáhǎ-ní-gǎ xii-yu, te ducaⁿ quide-gá chi ducaⁿ nǐ xáhaⁿ-gǎ xii cue ñaní tnáhǎ-yu ní xíndecu ndéé sanaha. ²⁹ Te Yá Ndiòxí ñá túú ndùu úhú iní-gá ìⁿ sá táxí-gǎ, te ni ñà túú ndìxi cuéchi iní-gá sá càháⁿ ñáhǎ-gǎ xii-o. ³⁰ Te nchòhó chi ñá túú sàndáá

iní-ndó Yă Ndiöxí ní cùu, dico vitna nini ñá túú sàndáá iní ñáhá ñăyiu isràél xii-gá, te ní cundàhú iní ñáhá-gă ní dácăcu nihnu ñaha-gă xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cùtnàhá ñá túú ní xóo quindáá iní-ndó-gă. Dico sáá nduu te natuha ñàhá-yu xii-gá te dácăcu nihnu ñaha-gă xii-yu sá cundàhú iní ñáhá-gă dàtná ní quide ñaha-gă xii nchòhó. ³² Te Yă Ndiöxí ní dáñá-gă sá dúcáⁿ cùnduu saá iní nchaa ñăyiu cuendá cuiní-gá cundàhú iní ñáhá-gă xii-yu.

³³ Te súuní vâha quide ñaha Yă Ndiöxí xii-o, te ío vâha xìní-gá nchaa cuéi sá ío andiü te cuéi sá ío ñuyíú-a, te ducaⁿ ïo vâha sàà nchaa sá xìní tnùní-gá. Te ñá ndácú-ó cùtnuní iní-ó nă cúú nchaa sá sání iní-gá cada-gá, te ni ñă ndácú-ó cùtnuní iní-ó nàcuáa ndùu cuendá nchaa sá quidé-gă. ³⁴ Te núú tütú-gá càchí-xi: “Vă yôo ïⁿ cùtnuní iní-xi nàcuáa sàni iní Yă Ndiöxí, te ni vă yôo ïⁿ ndàcu dacahu iní ñáhá xii-gá nàcuáa cáháⁿ-gá. ³⁵ Te Yă Ndiöxí ñá túú quide yica iní-gá cada-gá sá vâha sá cúú-xi ñăyiu cuendá ïⁿ sá sãñàhá-yu xii-gá chi ñá túú dùcaⁿ quide-gá”, duha càchí-xi núú tütú-gá. ³⁶ Te ducaⁿ chi mee Yă Ndiöxí ní taxi ndecu-gá nchaandi túhú sá ío ñuyíú, te ðiu-ni mee-gă táxí tnùní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sã ïo càhnu cuu-gá ni caa ni quíhíⁿ. Te ducaⁿ na cùnduu.

12

Cada-o nàcuáa nduu vétú iní Yă Ndiöxí

¹ Te vitna nchòhó ñăyiu ndècu ndihí-í ichi Xítóhó Jesucrístú càchí tnúhu-í xii-ndo sã Yă Ndiöxí

cúndàhú iní ñáhá-gǎ xii-o chìndee ñaha-gá, núu xíáⁿ càháⁿ ndàhú-í núú-ndó sǎ dáñá-ndó mée-ndo núú ndáhá-gǎ, te cada iní-ndó sǎ cúú-ndó dàtná ìⁿ táhú sǎ nchító-ó nǐ nduu táhú-gǎ. Te cuu-ndo ñǎyiu váha ñáyiu cada nchaa nàcuáa nduu vétú iní Yǎ Ndiǒxí chi ducaⁿ tàú-ndó càda-ndo sá cúú-xí-gǎ. ² Te vá cáncùⁿ nihnu-gá-ndó càda-ndo datná xǐquide nchaa ñáyiu ndècu ichi cuehé ichi duha ndècu ñuyíú-a, te vá cúhúⁿ-gǎ iní-ndó ìchi cuehé ichi duha-án, chi mee-nǎ sá vǎha cuhuⁿ iní-ndó, te ducaⁿ te cutnùní iní-ndó nchàa nacuáa cuìní Yǎ Ndiǒxí cada-ndo, te nchaa sá cuìní-gá cada-ndo cùu-xi mee-ni sá vǎha, sá ìo váha ndùu vétú iní-gá, te cùu-xi nchaa sá xíní ñùhu-xi cada-ndo núú-gǎ.

³ Te sá cuendá chùⁿ ní cundàhú iní ñáhá Yǎ Ndiǒxí ní taxi-gá xii-í xíáⁿ núu na càháⁿ-í dóho-ndo vitna: Vá cání iní-ndó ìⁿ sá ñà túú tàú-ndó càni iní-ndó te cucaháⁿ-ndo sǎ ìo càhnu cuu-ndo. Te nchòhó ní sándáá iní-ndó Yǎ Ndiǒxí núu chìndee ñaha-gá xii-ndo, te vitna chí cuáha cuendá núu ná daha núu chùⁿ-gá ndacu-ndo càda-ndo. ⁴ Te nchoo tìtní xichi cùu yiqui cuñú-ó, te ndi dííⁿ ndi dííⁿ chùⁿ quide-xi ìⁿ ìⁿ-xí. ⁵ Te ducaⁿ sǎtnahá tucu-xi cùu nchoo ñáyiu ndècu ndihí Xítóhó Jesucrìstú chi cuèi ná daha tnàhá-ó dico ìⁿ-ni cùu-o ndihí-gá, te ducaⁿ mée-o tucu ìⁿ-ni cùu-o.

⁶ Te mee Yǎ Ndiǒxí ní cundàhú iní ñáhá-gǎ xii-o nǐ taxi-gá chùⁿ taú-ó càda-o ìⁿ ìⁿ-o te chìndee ñaha-gá xii-o, te xìni ñuhu-xi cada-o nacuáa ndùu chiuⁿ ní taxi-gá cada-o. Te núu ní nduu táhú-ó núú-gǎ sá càháⁿ-ó tnùhu sá dácàhu iní ñáhá mée-gá xii-o te cáháⁿ-ó nàcuáa sàndáá iní-ó chìndee ñaha-gá xii-o, ⁷ àdi ní nduu táhú-ó núú-gǎ sá ìo váha

chindee-o tnàha ñáyiu-o te ðiu-ni ducaⁿ càda-o, àdi ní nduu táhú-ó dènehé-ó ñáyiu tnúhu-gá te ðiu-ni ducaⁿ càda-o, ⁸ àdi ní nduu táhú-ó nùú-gă sá dácàháⁿ-ó ñáyiu canchicúⁿ nihnú-yu ichi-gá te ðiu-ni ducaⁿ càda-o, àdi ní nduu táhú-ó nùú-gă sá cuăñaha-o xii tnaha ñáyiu-o sã ñihí-ó ndècu ndìhi-o te ðiu-ni ducaⁿ càda-o, dico ni yùhu ni iní-ó cuăñaha-o xii-yu, àdi ní nduu táhú-ó nùú-gă taxi tnùnì-ó te ðiu-ni ducaⁿ càda-o, te ni yùhu ni iní-ó càda-o, àdi ní nduu táhú-ó nùú-gă chindee-o cuè ñáyiu ndècu ndìhi tnúndòho tnúhu ndàhú te ðiu-ni ducaⁿ càda-o, te ío cudíí iní-ó càda-o chiuⁿ-áⁿ.

Nchaa nàcuáa tàú-xi cada nchaa ñáyiu ndècu ichi Xítóhó Jesucristú

⁹ Te cuu iní tnáhá ndìsa-ndo ìⁿ ìⁿ-ndo, te dañà-ndo nchàa sá cuèhé sá dúhá te cada-ndo mèe-ni sá vâha. ¹⁰ Te ío cuu iní tnáhá-ndó, te cada-ndo cuèndá sá ííⁿ-ní ñáyiu cùu-ndo, te ìⁿ ìⁿ-ndo càni-gá iní-ndó cànehe yiñuhu núú tnáhá-ndó.

¹¹ Te nducu ndèe-ndo cada-ndo nchaa chiuⁿ tahu Xítóhó Jesucristú vá tühío-ndo, te cada-ndo ni yuhu ni iní-ndó sã cúú-xí-gă.

¹² Te ío cudíí iní-ndó cùndecu-ndo chi ní ngúndecu ndìhi-ndo tnúhu ndee iní sá cùndècu ndìhi-ndo Xítóhó Jesucristú, te cada càhnu iní-ndó cuèi nándi na càda ñaha ñáyiu xii-ndo sã cuèndá-gá, te vá dáñá ndèé-ndó cãháⁿ ndìhi-ndo Yă Ndiöxí.

¹³ Te chindee tnàha-ndo te núú ío dava nchòhó ñáyiu ndècu ichi-gá lò ìⁿ sá cúmăní xii-ndo, te ío vâha cuu iní-ndó còto-ndo ñáyiu véxi vehe-ndo.

¹⁴ Te cãcãⁿ táhú-ndó nùú Yă Ndiöxí cuèndá nchaa ñáyiu nándi quide ñaha xii-ndo, te cãcãⁿ táhú-ndó

núú-gă sá ná chindee ñaha-gá xií-yu te ñá díú dà cácaⁿ táhú-ndó núú-gă sá ná dàcuíta nihnu ñaha-gă xií-yu.

15 Te núu íó ñáyíu cùdíí iní-xi te cudíí iní-ndó ndìhí-yu, te núu íó ñáyíu ndìhú iní-xi te ndìhú iní-ndó ndìhí-yu.

16 Te cuu ñⁿnuu-ndo cùndecu-ndo, te vá cádá càhnu-ndo mee-ndo, te tnahá tnúhu-ndo ndìhi nchaa ñáyíu ndàhú iní-xi, te vá cání iní-ndó sã ïo-gá túha-ndo.

17 Te vá nánchòcáva-ndo nàchinaa-ndo ñⁿ sá quidé ñàha ñáyíu xii-ndo, te ío nducu ndèe-ndo cada-ndo mee-ni sá vãha nàcuáa cuu váha iní ñáyíu. 18 Te ío nducu ndèe-ndo cada-ndo sá ndácú-ndó cùndecu váha-ndo ndìhi nchaa ñáyíu.

19 Te nchòhó ñáyíu ío cùu iní-í, vá cání iní-ndó nàchinaa-ndo ñⁿ sá cádá ñàha ñáyíu xii-ndo, chi cundetú-ndo sã méé Yã Ndiõxí ná nàchinaa-gá sá quidé ñàhá-yu xii-ndo, chi quee ndáá-xi nàcuáa càháⁿ Yã Ndiõxí núú tütú-gá núú càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gá núú tütú-gá. 20 Te xini ñuhu tucu-xi cada-ndo nacúáa càháⁿ tucu-xi ñngá xichi núú tütú-gá núú càchí-xi: “Te núu ñáyíu cùu úhú iní ñàhá xii-ndo ñá túú sã cóhó sã cáxí-yu te cuáñaha-ndo xii-yu, te núu ducaⁿ na càda-ndo te ío cucahaⁿ núú-yu”, duha càchí-xi núú tütú-gá. 21 Te núu íó ñⁿ sá quidé ñàha tnahá ñáyíu-ndo xii-ndo te vá nánchòcáva-ndo nàchinaa-ndo sá quidé ñàhá-yu xii-ndo, chi cada-ndo sã vãha sá cúú-xí-yu, te ducaⁿ te vá cádá-ndó sã ñà túú tàú-ndó càda-ndo núú Yã Ndiõxí dàtná quidé-yu.

13

1 Te nchaa ñáyiú tòú-yú quíndáá iní-yú nchaa cue téé cùchiuⁿ, chí Yá Ndiöxí ní cachí-gá sá cùndècu téé cùchiuⁿ ñuyíú-a, núu xǎⁿ xǐndecu-güedé vitna. 2 Te nchaa ñáyiú ñá túú sàndáá iní ñáhá xìi cue téé cùchiuⁿ ñá túú tnahá iní Yá Ndiöxí sá dúcáⁿ quidé-yú, chí mee-gǎ ní cachí-gá sá cùndècu-güedé. Te nchaa ñáyiú ducaⁿ ñà túú sàndáá iní ñáhá xìi cue téé cùchiuⁿ nacháhu-yú sá dúcáⁿ quidé-yú. 3 Te nchaa ñáyiú quide váha ñá túú yùhú-yú cue téé cùchiuⁿ chí quide váha-yú, dico nchaa ñáyiú ñá túú quide váha chí xǐyùhú-yú cue téé cùchiuⁿ. Te vitna núu nchòhó cuení-ndó sǎ vǎ yùhú-ndó cuè téé cùchiuⁿ te chí cáda vǎha, te ducaⁿ te cáháⁿ váha-güedé cuèndá-ndó. 4 Te Yá Ndiöxí ducaⁿ ní cachí-gá cundecu-güedé cuèndá cada-güedé sá ñà túú ñà cuu cundecu-ndo, te núu ñá túú quide váha-ndo ndècu-ndo te quíyùhú iní-ndó núú-güedé, chí ñá túú àúⁿ ñà cuu ndècu ndíhi-güedé tnúhu ndee iní dandòho-güedé nchaa ñáyiú ñá túú quide váha, chí Yá Ndiöxí ducaⁿ ní cachí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha. 5 Núu xǎⁿ ío xìni ñuhu-xi sá quíndáá iní-ndó nchaa cue téé cùchiuⁿ, te ñá díú sǎ yùhú-ndó dandòho ñaha-güedé xii-ndo, chí cada-ndo sǎ cútnùní iní-ndó sǎ cúú-xí ñⁿ sá vǎha. 6 Chí ñiú cuèndá xǎⁿ sàcáⁿ-ndó díhúⁿ núú cuè téé cùchiuⁿ, te ducaⁿ chí Yá Ndiöxí ducaⁿ ní cachí-gá cundecu-güedé te ñiú-ná chìuⁿ ndeé-güedé ñúhú iní-güedé.

7 Te nacháhu-ndo nchaa sá tòú-ndó núú nchaa ñáyiú tòú-ndó núú-xi, te cuèi díhúⁿ tòú-ndó cuèndá

ñuhu-ndo nũú cuè téé cùchiuⁿ àdi nágá díhúⁿ tàú-ndó nũú-güedě te nacháhu-ndo nũú-güedě. Te ío-gá canehe-ndo sã yíñuhu núú nchàa ñáyiu cùnuu, te cãháⁿ váha-ndo ndìhí-yu. ⁸ Te vá dácuidó-ndó ndùu nacháhu-ndo sã tàú-ndó nũú tnàha ñáyiu-ndo, te cuu iní tnáhá-ndó ìⁿ ìⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o. ⁹ Te duha ndùu tnúhu càháⁿ Yã Ndiõxí cuendá nchaa sá vã cúú càda-o: “Nchaa nchòhó cue téé vá cãháⁿ ndihí-ndo ñáyiu dîhí te núu ñá díú ñàdihí-ndó cùú-yu, te ducaⁿ-ni nchàa nchohó cue ñáyiu dîhí tucu vá càháⁿ ndihí-ndo tēe te núu ñá díú yî-ndo cuu-güedé, te vá cáhni-ndó tnàha ñáyiu-ndo, te vá dúhú-ndó sã ndécú ndìhí-yu, te vá dácacu-ndo cuéchi neñúú, te vá xihó-ndó sã ndécú ndìhi tnaha ñáyiu-ndo”, nchaa xéhé càchí Yã Ndiõxí sá vã cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuáa cada-o cùndecu-o, te núu quide-o ìngá tnúhu sá càchí-xi: “Cuu iní-ndó nchàa tnaha ñáyiu-ndo dàtná cúú ìní-ndó mēe-ndo”, duha càháⁿ tnúhu-áⁿ. Te nchaa dava-gá quidé-ó te núu quide-o nacuáa càháⁿ tnúhu-a. ¹⁰ Te nchaa ñáyiu cùu iní tnàha ñáyiu-xi te ñá túú quide úhú ìní-yu tnàha ñáyíú-yu, te núu ducaⁿ cùu ìní-yu tnàha ñáyíú-yu te quidé-yu nàcuáa càháⁿ tnúhu sá sánú ìchi ñaha xii-o nacuáa cada-o cùndecu-o.

¹¹ Te ducaⁿ xìni ñuhu-xi cada-ndo chi sa ní cutnùní ìní-ndó nàcuáa ta xìca nduu cuáháⁿ ñuyíú-a, te ní sáá nduu sá ìo xìni ñuhu-xi ndixi túu ìní-ó càda-o nchaa nacuáa càháⁿ Yã Ndiõxí, chi vitna sa ní cuyatni-gá nduu nàcuaca ñaha Xitohó

Jesucrìstú xii-o dàcúúxí ndèé cùtnàhá ní sándáá iní-ó tnùhu-gá. ¹² Te cada iní-ndó sã dàtná ìⁿ niú sá sà ta cuyatni túndaá, ducaⁿ sãtnahá-xi cùu ñuyíú yíca cuèchi-a chi sa ta cùyatni nduu quixi tucu Xítóhó Jesucrìstú, te núu xíáⁿ xíní ñùhu-xi dañá-o nchaa sá cuèhé sá dúhá te cada-o mée-ni sá vãha, te ducaⁿ te ni ìⁿ sá cuèhé sá dúhá vã cùnùu-xi taxi tnuní ñáhá-xí xii-o, te ducaⁿ te vá cúú-gã-ó dàtná ñáyiu ndècu núú néé chi cuu-ná-ó dàtná ñáyiu ndècu núú dìtó. ¹³ Te cada-o nchàa nacuáa tàú-xi cunduu cundecu-o dàtná tàú-xi cada ñáyiu ndècu ichi Xítóhó Jesucrìstú, te vá quìhíⁿ-ó vico cuehé vico duha, te vá cúú-ó ñáyiu quihu, te ni vã càháⁿ ndihí-o ñáyiu dìhí te núu ñá díú ñàdihí-ó cùú-yu, te ducaⁿ-ni cuè ñáyiu dìhí tucu vá càháⁿ ndihí-yu téé te núu ñá díú yíⁿ-yu cùu-güedé, te ni vã cùndècu-o ichi díí ìní, te ni vã nàá-ó ndihí tnahá ñáyiu-o, te ni vã cúú-ó ñáyiu cuédú ìní. ¹⁴ Te vitna nchòhó dañá-ndo mée-ndo sá Xítóhó Jesucrìstú ná chindee ñaha-gá xii-ndo càda váha-ndo cùndecu-ndo datná quidé mée-gá ndécú-gã, te vá cání-gã iní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá ìní-ndó.

14

Vá cuátnùhu tnahá-o nacuáa ndècu-o ichi Xítóhó Jesucrìstú

¹ Te núu ìⁿ ñáyiu ndècu ichi Xítóhó Jesucrìstú ñá túú tècú tnùní váha-yu nàcuáa cuíní Yã Ndiõxí cadá-yu, te queheⁿ cuèndá-ni-ndõ-yu te vá ténáá tnáhá-ndó ndihí-yu. ² Chi ìó ñáyiu sàni iní sá cúú vãha iní Yã Ndiõxí sá cúú càxí-yu nání nìhí-yu, te

dava ñáyiú ñá túú cùtnuní váha iní-yu nàcuáa càháⁿ Yă Ndiöxí te mee-ni yücú xéxí-yu. ³ Te ñáyiú xèxi nchaa núú sǎ ñihí-yu te vá dáquèe tíhǔ-yu ñáyiú ñá túú xèxi, te ducaⁿ-ni ñáyiú ducaⁿ ñà túú xèxi-áⁿ vǎ cuátnùhú-yu nchaa ñáyiú ducaⁿ xèxi nchaa núú sǎ ñihí-xi-áⁿ, chi tnàhá ñáyiú ducaⁿ xèxi nchaa núú sǎ ñihí-xi-áⁿ quéhéⁿ cuèndá ñáhá Yă Ndiöxí xií-yu. ⁴ Te ñá túú ndècu ndihí-o tnúhu ndee iní cuatnúhu-o ñáyiú xìnu cuechi, chi mee ñáyiú cùu patröðⁿ-yu tàú-yu cáháⁿ-yu te núu cùndáá ñáyiú xìnu cuechi núú-yu àdi ñá túú cùndáá-yu. Te ducaⁿ sǎtnahá-xi cùu ñáyiú xìnu cuechi núú Yă Ndiöxí, chi mee-gǎ cáháⁿ-gǎ te núu nása quidé-yu, te diu-ni mee-gǎ cada te cundáá-yu cundécú-yu núú-gǎ.

⁵ Te na càchí tnúhu tucu-í xii-ndo sǎ íó ñáyiú càchí sǎ íó dava nduu ío càhnu cuu-xi, te íó tucu dava ñáyiú càchí-yu sǎ ìⁿ-ni cuu-xi nchaa-ni nduu, te xìni ñuhu-xi sǎ cùtnuní ndáá iní-yu sǎ ndáá cúú-xí nàcuáa càháⁿ-yu ìⁿ ìⁿ-yu. ⁶ Te ñáyiú cánehe íí dava nduu quidé-yu sǎ néhě-yu sǎ yíñùhu núú Yă Ndiöxí, te ñáyiú càchí sǎ ìⁿ-ní cùu-xi nchaa-ni nduu quidé-yu sǎ néhě-yu sǎ yíñùhu núú Yă Ndiöxí tnàhá-yu. Te diu-ni ducaⁿ sǎtnahá-xi cùu nchaa ñáyiú xèxi nchaa nání ñihí-yu, chi quidé-yu sǎ néhě-yu sǎ yíñùhu núú Yă Ndiöxí, chi ndàcáⁿ táhǔ-yu núú-gǎ cuèndá nchaa sǎ ñihí-yu. Te diu-ni ducaⁿ sǎtnahá-xi cùu nchaa ñáyiú ñá túú xèxi nchaa núú sǎ nchító-ó chi quidé-yu sǎ néhě-yu sǎ yíñùhu núú Yă Ndiöxí, te ndàcáⁿ táhǔ-yu núú-gǎ cuèndá nchaa sǎ ñihí-yu.

⁷ Te nchoo cuéi vitna ndècu vívú-ó àdi cuéi na

cúu-ó dico ñá díu cuendá méé-ó cúu-ó. ⁸ Chi vitna ndècu vívú-ó te ndècu-o sá cúu-xí Xítóhó Jesucristú àdi cuéi na cúu-ó dico cuú-ó ñu-ni sá cúu-xí-gă, núu xǎⁿ cuéi vitna ndècu vívú-ó àdi cuéi na cúu-ó dico ñu-ni Xítóhó Jesucristú cúu cuendá ñáhá-gă xii-o. ⁹ Chi Xítóhó Jesucristú ní xíhí-gá te ní ndoto-gá, te vitna cùu-gá Xítóhó nchaa ñáyi, cuéi ñáyi xǎndecu vívú te cuéi ñáyi ní xíhí.

¹⁰ Te nchòhó, ñá túu ndùu váha-xi cuatnuhu tnàha-ndo nacuaá ndècu-ndo ichi Xítóhó Jesucristú, te ni ñà túu ndùu váha-xi daquèe tíhú tnáhá-ndó, chi nchaa-o sǎá nduu cùndecu-o núu Xítóhó Jesucristú, te mee-gă cachí-gá te núu ní quide ndáá-ó àdi ñá túu ní quide ndáá-ó. ¹¹ Te Yá Ndiǒxí cǎchí-gá núu tütú-gá:

Yúhú Yǎ Ndiǒxí ndécù-í cǎchí tnúhu ndáá-í xii-ndo
sǎ nchàa ñáyi ngüíñí xítí-yu núu-í,
te ncháa-yu cǎháⁿ-yu sá yúhú cúu-í Ndiǒxí.

Duha cǎchí Yǎ Ndiǒxí núu tütú-gá. ¹² Núu xǎⁿ nchaa-o ndì díⁿ nàcani tnúhu-o núu Yǎ Ndiǒxí nchaa sá ní quide-o.

Vá dácuíta nihnu tnàha-o

¹³ Núu xǎⁿ vá cuatnuhu tnaha-gá-ndó, te cada yica-ndo càda-ndo mee-ni sá vǎha, te vá cáda-ndó ñⁿ sá ñà túu tàu-ndó càda-ndo cuendá sá vǎ cuíta nihnu dava ñáyi ndècu ndíhi-ndo ichi Xítóhó Jesucristú. ¹⁴ Te yúhú ndécú ndíhi-í Xítóhó Jesucristú te cùtnuní ndáá iní-í sá ncháa núu sǎ cúu cǎxi-o cuu-ni cǎxi-o te vá cúu cuéchi. Te ñáyi sàni iní sá vǎ cúu cǎxi-yu te núu na cǎxi-yu te cuu cuéchi xí-yu. ¹⁵ Te nchòhó, te núu cuendá sá xéxi-ndó nchàa núu sǎ cúu cǎxi-ndo, cuendá xǎⁿ ñá túu-gă cúu vǎha iní nchaa ñáyi ndècu ndíhi-ndo ichi

Xítohó Jesucrìstú, te ñá túú-gă quidé-ndó sã cúú ìní ndisa-ndõ-yu te núu ducaⁿ na càda-ndo, te núu ìⁿ sá sání ìní-ndó càxi-ndo te cùtnuní ìní-ndó sã xǎⁿ cada-xi cuíta nihnu ñáyiu ndècu ndìhi-ndo ichi Xítohó Jesucrìstú te vá caxí-ndó xǎⁿ te núu ducaⁿ, chi Xítohó Jesucrìstú ní xíhí-gá cuendá-yu. ¹⁶ Te núu ìⁿ sá quidé-ndó sàni ìní-ndó sã cúú-xí ìⁿ sá vâha, te ñáyiu cächí-yu sá ñà túú vâha te vá cádá-ndó cuendá sá vâ cãháⁿ cuèhé-yu cuendá-ndó. ¹⁷ Te sá yíndàha ñaha Yá Ndiöxí xii-o xǎⁿ ío xìni ñuhu-xi cada ndáá-ó cùndecu-o, te cundecu váha ndìhi tnàha-o, te cudíí ìní-ó cùndecu-o chi Espíritú-gá ndécú ndìhi ñaha-xi xii-o, te nchaa xéhé ïo-gá cúnùu dacúúxí sã cóhó sã caxí-ó. ¹⁸ Te nchaa ñáyiu ducaⁿ quide nchaa sá ïo-gá xíní ñuhu-xi, xinu cuechí-yu núú Xítohó Jesucrìstú, te sá dúcáⁿ quidé-yu te ndùu vétú ìní Yă Ndiöxí, te cùdúú-yu núú ñáyiu.

¹⁹ Te nchoo chǐ ná ndùcu-o nacuáa cada-o cùndecu ndìhi váha tnàha-o, te nducu tùcu-o nacuáa cada-o chìndee tnúhu tnàha-o nacuáa cuíta cundáá-gá-ó núú Xítohó Jesucrìstú quíhíⁿ. ²⁰ Te ñá díú sã cuendá ìⁿ núú sã xéxí-ó, te dàquee tíhú-ó sã vâha ní quide ñaha Yă Ndiöxí xii tnàha ñáyiu-o. Te na cächí tnúhu ndáá-í xii-ndo sã ncháá-ní núú sã cúú càxi-o, te dícó-ni sá ñà túú ndùu váha-xi núú sá cuendá-ni sá caxí-ó ìⁿ núú sã cúú càxi-o cuíta nihnu ìⁿ tnàha ñáyiu-o. ²¹ Te váha-gá sá vâ caxí-ó cùnúú te vá cóhó ndidí, te ni ñà túú năgá cada-o te núu xito-o sá xǎⁿ cada te ngúíta tnàha ñáyiu-o cádá-yu sá ñà túú vâha, àdi xito-o sá xǎⁿ cada te ngúíta-yu cani ìⁿ cani úú ìní-yu cundecú-yu ichi Xítohó Jesucrìstú, te vá cùndáá-gá-yu núú-gă te

núu ducaⁿ na càda-o. ²² Te núu ìⁿ sá vǎha sàni iní-ó càda-o, te vá dátũu-o nũũ ñǎyiu chi mee-ni nũũ Yǎ Ndiõxí dàtũu-o. Te nchoo cùu-o ñǎyiu ío váha táhú-xi te núu cùtnuní ndáá iní-ó sǎ quidé ndáá-ó nũũ nándi cùu sá quidé-ó, te cùtnuní iní-ó sǎ ñà díú ìⁿ cuéchi cùu-xi sá quidé-ó. ²³ Te núu nchoo sàni iní-ó sǎ quidé vǎha-o àdi ñá túú quide váha-o òré xéxí-ó ìⁿ núú sǎ xéxí-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chi ñá túú ìⁿ-ni sá sání iní-ó, chi nchaa núú sǎ quidé-ó sàni ìⁿ sani úú iní-ó nũũ váha-ni àdi ñá túú vǎha-ni, te cuu cuéchi xii-o sǎ dúcáⁿ quide-o.

15

Cada-o sǎ vǎha sá cúú-xí tnàha ñǎyiu-o

¹ Te nchoo ñǎyiu ío váha sàndáá iní ñáhá xii Xítóhó Jesucristú, xini ñuhu-xi cuáñaha-o tnũhu ndee iní xii ñáyiu ñá túú ñihí ndéé cùndecu ichi-gá, te vá cǎdá-ó mée-ni sá cúú-xí mée-o. ² Te cada-o sǎ vǎha nàcuáa cuu váha iní tnàha ñáyiu-o cuendá cuu-xi sá vǎha sá cúú-xí-yu, te ducaⁿ cuita ñihí ndéé-gǎ-yu quindáá iní-yu Xítóhó Jesucristú. ³ Te Xítóhó Jesucristú ñá túú ní quide-gá mee-ni sǎ cúú vǎha iní mée-gǎ, te ní quee ndáá-xi nàcuáa càháⁿ-xi núú tütú Yǎ Ndiõxí nàcuáa ní xáhaⁿ Xítóhó Jesucristú xii-gá, te cǎchí-xi: “Nchaa ñáyiu cùu úhú iní ñáhá xii-n ní xícuèhé ní xíduha ñáhá-yu xii-í”, duha càháⁿ-xi núú tütú Yǎ Ndiõxí nàcuáa ní xáhaⁿ Xítóhó Jesucristú xii-gá. ⁴ Te ndéé sanaha ñi ngúndeé nchaa tnúhu Yá Ndiõxí núú tütú-gá, te ducaⁿ ñi ngúndeé cuendá dacuàha-o, te tnúhu-án dánèhé ñáhá-xí cùndeu cahnu iní-ó cuèi nándi nà yáha-o cùndecu-o ichi-gá, te sá xii tnũhu-án

te vá ndìhú-gá iní-ó cùndecu-o, te ðiu-ni sá xíí tñuhu-án cundecu ndìhi-o tñuhu ndee iní. ⁵ Te Yá Ndiöxí quidé-gã ndécú ndìhi-o tñuhu càhnu iní, te ðiu-ni-gá quidé-gã ñá túú ndìhú iní-ó ndècu-o. Te xicáⁿ táhù-í núú-gã sá ðíú-gã ná cádá te cuu ñⁿnuu-ndo cùndecu-ndo datná ní quide mee Xítohó Jesucrístú cùtnàhá ní xíndecu-gá ñuyíú-a. ⁶ Te ducaⁿ nchàa-ndo cuu ñⁿnuu-ndo, te danìhí tnáhá-ndó yócó táchí-ndó te cachí-ndó sã ïo càhnu cuu Yá Ndiöxí Yaá cúú Tátá Xítohó Jesucrístú.

Ñáyiú ñá túú cùu ñáyiú isràél ní níhŷ-yu tñuhu Xítohó Jesucrístú

⁷ Te núu xiãⁿ chí quéhéⁿ cuendá tnáhá dàtná ní quide Xítohó Jesucrístú ní queheⁿ cuendá ñáhá-gã xii-o, te núu ducaⁿ na càda-ndo te ío cuu càhnu Yá Ndiöxí. ⁸ Te na càchí tñuhu-í xii-ndo sã Xítohó Jesucrístú ní quixi-gá ní quide-gá sá vãha sá cúú-xí ñáyiú isràél, te sá dúcáⁿ ñí quide-gá xiãⁿ cùtnùní ndáá iní-ó sã Yã Ndiöxí quidé-gã ñí sá càháⁿ-gá, chí Xítohó Jesucrístú ní quide-gá nchaa nàcuáa ní xáhaⁿ Yã Ndiöxí xii cue ñaní tnáhá-ó ñí xíndecu ndéé sanaha. ⁹ Te ducaⁿ ñí quide Xítohó Jesucrístú sá vãha sá cúú-xí ñáyiú isràél cuendá nchaa ñáyiú ñá túú cùu ñáyiú isràél cachí-yu sá ïo càhnu cuu Yá Ndiöxí, te ducaⁿ quèsahá-yu chí ío cùndahú iní ñáhá-gã chíndèe ñaha-gá xií-yu, te quee ndáá-xi nàcuáa càháⁿ-xi núú tütú Yã Ndiöxí núú càchí-xi: Yúhú cachí-í sá ïo càhnu cuu-n núú nchàa ñáyiú ñá túú cùu ñáyiú isràél,
te cata-í ndudú chíñuhu ñaha-í xii-n.
Duha càchí-xi núú tütú-gá ¹⁰ Te càchí tucu-xi núú tütú-gá:

Te nchòhó ñáyiú ñá túú cùu ñáyiú isràél ío chí cúdǎí
 ìní ndìhi ñáyiú isràél ñáyiú ndècu ndìhi-í.
 Duha càchí-xi núú tütú-gá. ¹¹ Te càchí tucu-xi ìngá
 xichi núú tütú-gá:

Nchaa nchòhó ñáyiú ñá túú cùu ñáyiú isràél chí
 càháⁿ sá ìo càhnu cuu Yá Ndiǒxí,
 te nchaa ñáyiú na càháⁿ-yu sá ìo càhnu cuu-gá.
 Duha càchí-xi núú tütú-gá. ¹² Te ndí Chàìá càchí
 tucu ndí núú tütú Yă Ndiǒxí:
 Coò ìⁿ ñaní tnáhá ndí Isàì téé ní xíndecu ndéé
 sanaha,
 te téé-áⁿ taxi tnùnì-dé cue ñáyiú ñá túú cùu ñáyiú
 isràél,
 te ñáyiú-áⁿ cundee cùu cahnu iní ñáhă-yu xii-dé.
 Duha ní càháⁿ ndí Chàìá càchí-xi núú tütú-gá.

¹³ Te xìcáⁿ táhù-í núú Yă Ndiǒxí Yaá ní taxi
 tnúhu ndee ìní ndécú ndìhi-o sá méé-gă ná càda
 ío cudǎí ìní-ndó cùndecu-ndo, te ducaⁿ ìo váha
 cundecu ìní-ndó nǔú-gă chi sàndáá ìní-ndó-gă, te
 ducaⁿ Espíritú-gá ná càda te uuⁿ-gá uuⁿ-gá cuita
 ngúndecu ndìhi-ndo tnúhu ndee ìní quíhíⁿ sá cáda
 váha ñaha-gă xii-ndo.

¹⁴ Te nchòhó ñáyiú ndècu ndìhi-í ichi Xítóhó
 Jesucrìstú cùtnuní ndáá ìní-í sá nchòhó ío váha
 ìní-ndó, te ducaⁿ ìo váha cùtnuní ìní-ndó nchàa
 tnúhu váha, te ducaⁿ ìo dàsahú tnáhá-ndó nàcuáa
 cundecu-ndo. ¹⁵ Te dava tnúhu ní chídó tnùnì-í
 núú tütú-a cùu-xi tnúhu sá ìo càháⁿ-í dóho-ndo, te
 ducaⁿ ñí tee-í cuèndá sá nchòhó dandàcu ìní-ndó
 tnúhu-áⁿ, te ní tee-í chí Yá Ndiǒxí ní cundàhú ìní
 ñáhá-gă xii-í ní taxi-gá chùⁿ quide-í ¹⁶ xínú cuèchi-í
 núú Xítóhó Jesucrìstú càháⁿ-í tnúhu-gá núú ñáyiú
 ñá túú cùu ñáyiú isràél. Te tnúhu-áⁿ cùú-xí tnúhu sá

sánú ìchi ñaha xii-o nacuáa naníhí tàhú-ó, te ducaⁿ dànehé-í ñáiyu ñá túú cùu ñáiyu isràél tnúhu Yá Ndiõxí cuendá cuú-yu dàtná ìⁿ sá ndúú tǎhú-gǎ, te Espíritú-gá quidé-xí cùú-yu ñáiyu cùd̄iu núú-gǎ, te cùu váha iní ñáhá-gǎ xií-yu.

17 Te ío váha cùu iní-í cuendá nchaa chùuⁿ quide-í sá cúú-xí Yǎ Ndiõxí, chi Xítóhó Jesucrístú ndécú nd̄ih̄i ñaha-gá xii-í. 18 Te mee-ni nàcuáa quide Xítóhó Jesucrístú chíndèe ñaha-gá xii-í xǎⁿ-ni càháⁿ-í, te sá dúcáⁿ quide-gá xǎⁿ ní sándáá iní cue ñáiyu ñá túú cùu ñáiyu isràél tnúhu-gá. Te ducaⁿ chí ní chindee ñaha-gá xii-í ní cáháⁿ-í tnúhu-gá te ducaⁿ-ni ñí chindee ñaha-gá xii-í ní quide-í t̄it̄ní núú sǎ ñí quide-í núú-yu ní xiní-yu. 19 Te Espíritú Yǎ Ndiõxí ní quide-xi ní quide-í t̄it̄ní núú sǎ vǎ yõo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáháⁿ-í ní cáháⁿ-í tnúhu Xítóhó Jesucrístú núú ñáiyu cuèi ndéé ñuú Jerusàlén, te cuèi ndéé distritú Íliricú, núu nchaa ñuú-áⁿ ñí sáháⁿ-í ní cáháⁿ-í núú-yu tnúhu sá càháⁿ nàcuáa naníhí tàhú-ó. 20 Te ducaⁿ ïo ndùcu ndee-í càháⁿ-í tnúhu sá càháⁿ nàcuáa naníhí tàhú-ó núú vǎtá ñihí-gá-yu tnúhu cuendá Xítóhó Jesucrístú, te ducaⁿ quide-í chi ñá túú cuiní-í quíhíⁿ-í cáháⁿ-í tnúhu-gá núú sà xíndecu ñáiyu càháⁿ tnúhu-gá. 21 Te quide-í nàcuáa càháⁿ-xi núú t̄utú Yǎ Ndiõxí núú càchí-xi: Ñáiyu vǎtá ñihí-gá tnúhu cuendá Yaá quixi ñuyú te ñihí-yu,

te ducaⁿ tècú tnùní-yu tnúhu-gá.
Duha càchí-xi núú t̄utú-gá.

Té Pǎblú cuiní-dé quíhíⁿ-dé ñuú Rómá

22 Te sá dúcáⁿ càháⁿ-í tnúhu-gá nõu xiãⁿ ñã túú ní ndàcu-í quixi-í quixi coto ñaha-ĩ xii-ndo cuẽi ducaⁿ-ni sàni iní-í quixi coto ñaha-ĩ. 23 Te ní cuu titní cuía ducaⁿ-ni sàni iní-í quixi coto ñaha-ĩ xii-ndo, te vitna ní ndihi-í nchaa iha ní cáháⁿ-í tnúhu Xítohó Jesucristú núú nchàa ñáyiu. 24 Núu xiãⁿ sání iní-í sá ndùu na quihíⁿ-í nacióⁿ Èspaña te yáha cáháⁿ-í quini-í nása ndècu-ndo, te dàvá-áⁿ ïo cudíí iní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee iní-ndó chindee ñaha-ndo xii-í. 25 Te vitna quihíⁿ-í ñuú Jerusálén quínehe-í sá ndúú tãhú ñáyiu ndècu ichi Xítohó Jesucristú xíndecu yàcáⁿ. 26 Te ñáyiu xíndecu ichi Xítohó Jesucristú ndécú dístítú Macèdoniá, ndihi dístítú Acáyá ní cuu ìⁿnùú-yu ní sacáⁿ tnáhã-yu sá ndúú tãhú ñáyiu ndàhú xíndecu ichi-gá ndécú ñuú Jerusálén. 27 Te ducaⁿ tnàhí ní cudíí iní-yu cadá-yu, te ducaⁿ tnàhí tàú-yu cadá-yu chindèé-yu ñáyiu xíndecu ñuú Jerusálén. Te ñáyiu Macèdoniá ndihi ñáyiu Acáyá-áⁿ ñà túú cùú-yu ñáyiu isràél. Te ñáyiu xíndecu ñuú Jerusálén cùú-yu mee-ni ñáyiu isràél, te ducaⁿ tàú-yu cadá-yu chi sá cuèndá ñáyiu isràél-áⁿ ñí níhí-yu tnúhu sá càháⁿ nàcuáa naníhí tãhú-yu, núu xiãⁿ tàú-yu chindee ñàhá-yu ndihi nchaa sá nihí-yu. 28 Te sátá ná yãha quínguáha cuèndá-í-yu sá ndúú tãhú-yu, te ducaⁿ te dàtnuní quee-í quihíⁿ-í nacióⁿ Èspaña, te ichi yáha-í yáha cáháⁿ-í núú ndécú-ndó. 29 Te cùtnuní ndáá iní-í sá òré ná quèxio-í núú ndécú-ndó, te Xítohó Jesucristú ïo chindee ñàha-gá xii-í cáháⁿ-í tnúhu-gá núú-ndó nàcuáa ïo váha cundecu-ndo ìchi-gá.

30 Te nchòhó ñáyiu ndècu ndihi-í ichi Xítohó

Jesucrìstú càháⁿ ndàhú-í núú-ndó sǎ ìo chindee ñàha-ndo xii-í càháⁿ ndìhi-o Yǎ Ndiöxí cuendá-í, te ducaⁿ càda-ndo chi ndècu ndìhi-ndo Xítóhó Jesucrìstú. Te Espíritú Yǎ Ndiöxí quidé-xí cùu iní tnàhá-ó ìⁿ ìⁿ-o. ³¹ Te ío chí càcáⁿ táhú nǔú Yǎ Ndiöxí sá ná còto ñaha-gá xii-í, te ñá túú nǎ cada ñaha nchàa ñáyiú ñá túú sàndáá iní ñáhá xii-gá xǐndecu distritú Jùdeá. Te cacáⁿ táhú tùcu-ndo núú-gǎ sá ncháá sǎ cánèhe-í quíhíⁿ nduu táhú ñáyiú ndècu ichi-gá ndécú ñúú Jerusàlén ío váha cuu iní-yu queheⁿ cuendá-yu. ³² Te ducaⁿ càda-ndo cuendá sá nǔu Yá Ndiöxí ná cǎchí-gá te ío cudíí iní-í òré quexìo-í núú ndécú-ndó, te ío váha cuu iní-í cundecu ndìhi ñaha tnàì xii-ndo. ³³ Te vitna xicáⁿ táhù-í núú Yǎ Ndiöxí Yaá quidé ìo váha cùu iní-ó ndècu-o sá ná chindee chitúu ñaha-gǎ xii-ndo nchàa-ndo. Te ducaⁿ na cùnduu.

16

Té Pǎblú quidé ndèe iní-dé ñáyiú ndècu ñúú Ròmá

¹ Te yúhú tendaha-ǐ tá Fèbé quixi-xi núú ndécú-ndó, te tnàhá-xi ndècu-xi ichi Xítóhó Jesucrìstú, te quide-xi chiuⁿ Yá Ndiöxí sá cúú-xí ñáyiú ndècu ichi Xítóhó Jesucrìstú xǐndecu ñúú Cèncreá. ² Te cùní-í sá ìo váha cuu iní-ndó queheⁿ cuendá-ndó-xí, chí ndècu ndìhi-xi Xítóhó Jesucrìstú, te cada-ndo nàcuáa tàú-xi cunduu dàtná tàú-xi cada ñáyiú ndècu ichi-gá, te ío chindee-ndo-xi te núu ná cúú sǎ xíní ñùhu-xi, chí tnàhá-xi ío chindee-xi cue ñáyiú ndècu ichi Xítóhó Jesucrìstú, te tnàhá yúhú ducaⁿ ìo chindee-xi.

3 Te cúñaha-ndo ïo na càda ndee iní té Àquilú ndihì ñadhí-dé tá Priscilá, chi ñáyi-u-áⁿ ñi quide chiⁿ-í ndihí-yu ní quide-ndí chiⁿ Xítohó Jesucristú. 4 Chi mée-yu ní cácu cuú-yu sá cuèndá sá ñi dácácu ñahá-yu xii-í sá ñi yáha-í, núu xiáⁿ ío ndàcáⁿ táhù-í núu-yu, te ñá díú-ní yǔhú ducaⁿ ío ndàcáⁿ táhù-í núu-yu chi tnàhá nchaa ñáyi-u ñá túu cùu ñáyi-u isràél xĩndecu ichi-gá xĩndecu nchaa xichi ducaⁿ ío ndàcáⁿ táhũ-yu núú tẽ Àquilú ndihì núú ñadhí-dé tá Priscilá. 5 Te cúñaha tùcu-ndo sá ïo na càda ndee iní nchaa ñáyi-u xĩndecu ichi Xítohó Jesucristú tàcá vehe té Àquilú ndihì tá Priscilá dácuahá-yu tnúhu-gá, te cúñaha tùcu-ndo sá ïo na càda ndee iní té Epènetú chi tnàhá-dé ío ñùhu iní-í-dé, chi té-áⁿ cúú-dẽ té díhna nuu ñi sándáá iní tnúhu Xítohó Jesucristú distritú Acáyá. 6 Te cúñaha tùcu-ndo sá ïo na càda ndee iní tá Màriá xíchí ndécú ndihì-ndo, xíchí ío ndùcu ndee xinu cuechi núú Xítohó Jesucristú. 7 Te cúñaha tùcu-ndo sá ïo na càda ndee iní cue té cùu ndi mee-í té Àndrónicú ndihì té Jùniás, chi tnàhá-güedé ní xihì ndihì ñaha-güedẽ xii-í vecaá, te ío cùdiu-güedé núu nchàa cue té ní táúchíúⁿ Jèsús cáháⁿ tnúhu-gá. Te díhna-gá-güedé ní sándáá iní-güedé tnúhu Xítohó Jesucristú dàcúxí yǔhú.

8 Te cúñaha-ndo sá ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú. 9 Te cúñaha tùcu-ndo xii té Bãnú té cùndihì ñaha xii-o quide-o chiⁿ Xítohó Jesucristú sá ná càda ndee iní-dé, te cúñaha tùcu-ndo xii té Èstaquís sá ná càda ndee iní-dé chi tnàhá-dé ío ñùhu iní-í-dé. 10 Te cúñaha tùcu-ndo xii té Àpelés sá

10 ɔ na c̄ada ndee iní-dé, chi téé-án ɔ váha c̄undáá-dé núú Xítóhó Jesucristú, te cúñaha t̄ucu-ndo xii ñáyiú x̄ndecu vehe té Aristóbulú sá ɔ na c̄ada ndee iní-yu. 11 Te cúñaha-ndo xii té Herodión téé c̄uú ndi mee-í sá ɔ na c̄ada ndee iní-dé, te cúñaha-ndo xii ñáyiú nd̄ecu ichi Xítóhó Jesucristú x̄ndecu vehe té Nàrcisú sá ɔ na c̄ada ndee iní-yu. 12 Te cúñaha-ndo xii tnahá tá Trifená ndihí tá Trifosá sá ɔ na c̄ada ndee iní-yu, chi tñahá-yu quidé-yu ch̄iúⁿ Xítóhó Jesucristú. Te tñahá tá P̄ersidá x̄ichí nd̄ecú ndihí-o ichi Xítóhó Jesucristú cúñaha-ndo xii-xi sá ɔ na c̄ada ndee iní-xi, chi tñahá-xi ɔ nd̄ecu ndee-xi quide-xi ch̄iúⁿ Xítóhó Jesucristú. 13 Te cúñaha-ndo tñahá té R̄ífú téé ɔ váha s̄andáá iní tñúhu Xítóhó Jesucristú sá ɔ na c̄ada ndee iní-dé ndihí n̄aná-d̄ě, chi ñaha-án quidé iní-í sá cúú-án d̄atná n̄aná-í. 14 Te cúñaha-ndo sá ɔ na c̄ada ndee iní té Àsincritú, ndihí té Fl̄egonté, ndihí té H̄ermás, ndihí té P̄atrobás, ndihí té H̄ermés, ndihí nchaa dava-gá cue ñáyiú nd̄ecu ndihí-o ichi Xítóhó Jesucristú x̄ndecu ndihí-güedé. 15 Te cúñaha t̄ucu-ndo sá ɔ na c̄ada ndee iní té Filológó, ndihí tá J̄uliá, ndihí té N̄ereú, ndihí cúha té N̄ereú, ndihí tá Òlimpás, ndihí nchaa dava-gá ñáyiú s̄andáá iní tñúhu Xítóhó Jesucristú x̄ndecu ndihí-yu.

16 Te ɔ ȳiñúhu cada ndee iní tñahá-ndó ñ̄ⁿ ñ̄ⁿ-ndo. Te nchaa ñáyiú tàcá nchaa iha d̄acuaha tñúhu Xítóhó Jesucristú quidé nd̄e iní ñáhã-yu xii-ndo.

17 Te nchòhó ñáyiú nd̄ecu ndihí-í ichi Xítóhó Jesucristú càháⁿ-í dóho-ndo sá c̄adá cuendá-ndó n̄úú ɔ ñáyiú quide nacúá vá cúú ñ̄ⁿn̄uu-ndo cund̄ecu-ndo, chi ñáyiú-án s̄ánú ichi ñahá-yu ñ̄ⁿ ichi ñá túú v̄aha, chi ñá túú ñ̄ⁿ-ni cuu-xi tñúhu càháⁿ-yu

ndihi tnúhu sá nĩ níhí-ndó ndècu ndihi-ndo, te ñáyiú ducaⁿ xíquide vá nihí tnáhá-gã-ndó ndihí-yu. ¹⁸ Chi ñáyiú-án ñà túú quidé-yu chiúⁿ sá cúú-xí Xítohó Jesucristú, chi mee-ni sã cúú-xí mèé-yu quidé-yu, te mee-ni nchàa tnúhu sá ïo vii ío váha cuáháⁿ càháⁿ-yu òré cuáháⁿ-yu dándahú-yu nchaa ñáyiú ío yáchí sàndáá iní-xi ìⁿ tnúhu. ¹⁹ Te nchaa ñáyiú nihí-yu tnúhu sá nchòhó sàndáá iní-ndó tnúhu Xítohó Jesucristú, núu xíáⁿ ío cùdí iní-í. Te cùní-í sá nchòhó ío váha cutnùní iní-ndó nàcuáa cada-ndo mèe-ni sá vãha, te vá cání iní-ndó càda-ndo datná xíquide nchaa ñáyiú ndècu ichi cuehé ichi duha. ²⁰ Te Yá Ndiõxí Yaá quidé ïo váha cùu iní-ó ndècu-o ío ndihi cada-gá cuendá sá sàcuíhná ñà túú-gã ná cada ñaha-xi xii-ndo, te xicáⁿ táhù-í núú Xítohó Jesucristú sá ïo na chindee chítúu ñaha-gã xii-ndo.

²¹ Te té Timùteú téé quide ndihi-í chiúⁿ Xítohó Jesucristú iha quide ndee iní ñáhá-dě xii-ndo, te tnáhá té Lùciú, ndihi té Jàsón, ndihi té Sosipàtér cue téé cùu ndi mee-í quidé ndèe iní ñáhá-güedě xii-ndo.

²² Te tnáhá yúhú té Tèrciú téé càdúha tutú-a cuendá té Pãblú quidé ndèe iní ñáhà-í xii-ndo, chi ìⁿ-ni cùu-o ndihi Xítohó Jesucristú.

²³ Te tnáhá té Gãyú téé dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítohó Jesucristú. Te tnáhá té Èrastú téé yìndaha díhúⁿ ñúú quidé ndèe iní ñáhá-dě xii-ndo, te tnáhá té Cuártú téé ndècu ndihi-o ichi Xítohó Jesucristú quidé ndèe iní ñáhá-dě xii-ndo.

24 Te xìcáⁿ táhù-í núú Xítóhó Jesucrìstú sá ïo na chìndee chítúu ñaha-gă xii-ndo nchàa-ndo. Te ducaⁿ na cùnduu.

Cáháⁿ-ó sǎ ïo cǎhnu cuu Yá Ndiǒxí

25 Te vitna chí ná cǎchí-ó sǎ ïo cǎhnu cuu Yá Ndiǒxí, chí mee-gă cada te ío-gá cuita níhí ndéé-gă-ndó cùndecu-ndo ichi Xítóhó Jesucrìstú dàtná cǎchí tnúhu sá cáháⁿ nàcuáa naníhí tàhú-ó, tnúhu sá dánèhé-í ñáyiú cuèndá Xítóhó Jesucrìstú, te nchaa tnúhu-a ìⁿ-ni cùu-xi ndihì nchaa tnúhu sá ñí cachí Yá Ndiǒxí cuu yuhu ndéé cútnàhá ní ngáva ñuyíú, te vitna ní quee túu-xi, 26 chí mee Yá Ndiǒxí ní dátũ-gá núú-ó vitna, te cáháⁿ-ndí nàcuáa ní chídó tnùnì cue téé ní xóo cáháⁿ tnúhu Yá Ndiǒxí ndéé sanaha. Te ducaⁿ tnúhu sá ndúú yùhu ni cuu ta xíté nuu-xi níhì ñuyíú cuáháⁿ, chí ducaⁿ ñí cachí Yá Ndiǒxí Yaá ndécú nchàa nduu nchaa quíú cunduu cuèndá sá quèndáá iní ñáhá ñáyiú xii-gá, te tní^í-yu nchaa tnúhu cáháⁿ-gá.

27 ¡Te ìⁿdì-ni Yá Ndiǒxí cúú-gă Yaá ío sàá sá xìnì tnùnì-xi! ¡Te nchaa-o chí ná cǎchí-ó sǎ ïo cǎhnu cuu-gá, chí ndècu ndihì-o Xítóhó Jesucrìstú, te ducaⁿ-ni càda-o ni caa ni quíhíⁿ! Te ducaⁿ na cùnduu. Te ío chí cádá ndèe iní-ñǎ vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939